



水經注釋卷二十一 出剡縣之北出東風嶺嶺北地

仁和趙一清誠夫錄

汝水出河南梁縣勉鄉西天息山

地理志曰出高陵山即猛山也亦言出南陽魯陽縣之

大孟山又言出宏農盧氏縣還歸山博物志曰汝出燕

泉山竝異名也余以永平中蒙除魯陽太守會上臺下

列山川圖以方誌參差遂令尋其源流此等既非學徒

難以取悉既在遘見不容不述今汝水西出魯陽縣之

大孟山蒙柏谷巖障深高山岫邃密石徑崎嶇人蹟裁

水經注釋

交西即盧氏界也其水東北流逕太和城西又東流逕其城北左右深松列植筠柏交蔭尹公度之所棲神處也又東屈堯山西嶺下水流兩分一水東逕堯山南為湢水也即經所言湢水出堯山矣一水東北出為汝水歷蒙柏谷左右岫壑爭深山阜競高夾水層松茂柏傾山蔭渚故世人以名也津流不已北歷長白沙口狐白谿水注之夾岸沙漲若雪因以取名其水南出狐白川北流注汝汝水又東北趣狼臯山者也

東南過其縣北

汝水自狼臯山東出峽謂之汝阨也東歷麻解城北故

水經注卷二十一

鄭鄉城也謂之蠻中左傳所謂單浮餘圍蠻氏蠻氏潰者也杜預曰城在河南新城縣之東南伊洛之戎陸渾蠻氏城也俗以為麻解城非也蓋蠻麻讀聲近故也汝水又逕周平城南京相璠曰霍陽山在周平城東南者也汝水又東與三屯谷水合水出南山北流逕石碣東柱側刊云河南界又有一碣題言洛陽南界碑柱相對既無年月竟不知何代所表也其水又北流注於汝水汝水又東與廣成澤水合水出狼臯山北澤中安帝永初元年以廣成遊獵地假與貧民元初二年鄧太后臨朝鄧騭兄弟輔政世士以為文德可興武功宜廢寢蒐

狩之禮息戰陣之法于時馬融以文武之道聖賢不墜
 五材之用無或可廢作廣成頌云大漢之初基也揆厥
 靈囿營于南郊右轡三塗左枕嵩嶽面據衡陰背基王
 屋浸以波澁演以滎洛金山石林殷起乎其中神泉側
 出丹水涅池怪石浮磬燿焜于其陂桓帝延熹元年校
 獵廣成遂幸函谷關其水自澤東南流逕溫泉南與溫
 泉水合溫水殷源揚波于川左泉上華宇連蔭茨薨交
 拒方塘石沼錯落其間頤道者多歸之其水東南流注
 廣成澤水澤水又東南入於汝水汝水又東得魯公水
 口水上承陽人城東魯公陂城古梁之陽人聚也秦滅

東周徙其君于此陂水東南流合於澗水水出北山南

流注之又亂流注於汝水汝水之右有霍陽聚汝水逕

其北東合霍陽山水水出南山杜預曰河南梁縣有霍

山者也其水東北流逕霍陽聚東世謂之華浮城一清按章

懷後漢書注曰俗謂之張侯城非也春秋左傳哀公四年楚侵梁及霍

服虔曰梁霍周南鄙也建武二年世祖遣征虜將軍祭

遵攻蠻中山賊張滿時厭新柏華餘賊合攻得霍陽聚

即此一清按後漢書祭遵傳時新城蠻中山賊張滿屯結險隘為人害詔遵攻之而厭新柏華餘賊復與

滿合遂攻得霍陽聚水又逕梁城西按春秋周小邑也

道元抄變其詞耳于戰國為南梁矣故經云汝水逕其縣北俗謂之治城

非也以北有注城故也今置治城縣治霍陽山水又東北流注於汝汝水又右合三里水水北出梁縣西北而東南流逕其縣故城西故愚狐聚也地理志云秦滅西周徙其君于此因乃縣之杜預曰河南縣西南有梁城卽是縣也水又東南逕注城南司馬彪曰河南梁縣有注城史記魏文侯三十二年敗秦于注者也又與一水合水發注城東坂下東南流注三里水三里水又亂流入於汝汝水又東逕成安縣故城北按地理志潁川郡有成安縣侯國也史記建元以來功臣侯者年表曰漢武帝元朔五年校尉韓千秋擊南越死封其子韓延

年爲成安侯卽此邑矣世謂之白泉城非也俗謬耳汝水又東爲周公渡藉承休之徽號而有周公之嘉稱也汝水又東黃水注之水出梁山東南逕周承休縣故城東爲承休水縣故子南國也漢武帝元鼎四年幸雒陽巡省豫州觀于周室邈而無祀詢問耆老乃得孽子嘉封爲周子南君以奉周祀按汲冢古文謂衛將軍文子爲子南彌牟其後有子南勁紀年勁朝于魏後惠成王如衛命子南爲侯秦併六國衛最後滅疑嘉是衛後故氏子南而稱君也初元五年爲周承休邑地理志曰侯國也元帝置元始二年更曰鄭公

一清按漢書地理志亦作鄭公而後漢黃

瓊封邲鄉侯章懷注引說文曰邲潁川縣也漢潁川郡有周承休侯國元始二年更名曰邲音亢袁紹亦封邲鄉侯此云鄭王莽之嘉美也故汝渡有周公之名蓋藉公不詳其故

邑以納稱也世謂之黃城水曰黃水皆非也其水又東

南逕白茅臺東又南逕梁雀鄉西世謂之期城非也按

後漢書世祖自潁川往梁雀鄉馮魴先詣行所即是邑

也一清按方輿紀要云括地志周承休城一名梁雀塢或云卽梁瞿鄉也蓋瞿雀字形相似道元以世謂之

期城為非期瞿音相似然則雀字為正水積為陂世謂之黃陂東轉逕其

城南東流右合汝水

又東南過潁川邾縣南

汝水又東與張磨泉合水發北阜春夏水盛則南注汝

水汝水又東分為西長湖湖水南北五十餘步東西三

百步汝水又東扈澗水北出大劉山南逕木蓼堆東邾

城西南流入於汝汝水又右逕為湖湖水南北八九十

步東西四五百步俗謂之東長湖湖水下入汝古養水

也水出魯陽縣北將孤山北長岡下數泉俱發東歷永

仁三堆南又東逕沙川世謂之沙水歷山符壘北又東

逕沙亭南故養陰里也司馬彪郡國志曰襄城有養陰

里京相璠曰在襄城邾縣西南養水名也俗以是水為

沙水故亦名之為沙城非也又城處水之陽而以陰為

稱更用惑焉但流雜閒居裂漑牙移致令川渠異容津

途改狀故物望疑焉又右會堇溝水水出沛公壘西六十許步蓋漢祖入關往征是由故地擅斯目矣其水東北注養養水又東北入東長湖亂流注汝水也汝水又逕邳縣故城南春秋昭公十九年楚令尹子瑕之所城也激水注之水出魯陽縣之將孤山東南流許慎云水出南陽魯陽入父城從水敖聲一清按說文繫傳作父城今說文譌呂忱字林亦言在魯陽激水東入父城縣與桓水會桓水出魯陽北山水有二源奇導於賈復城合為一瀆逕賈復城北復南擊郟所築也俗語訛謬謂之寡婦城水曰寡婦水此瀆水有窮通故有枯渠之稱焉其水東北流至

父城縣北右注激水亂流又東北至邳入汝汝水東南左合藍水水出陽翟縣重嶺山東南流逕紀氏城西有層臺謂之紀氏臺續漢書曰世祖車駕西征盜賊羣起邾令馮魴為賊延褒所攻力屈上詣紀氏羣賊自降卽是處在邾城東北十餘里其水又東南流逕黃阜東而南入汝水汝水又東南流右與白溝水合水出夏亭城西又南逕龍城西城西北卽摩陂也縱廣可一十五里魏青龍元年有龍見於邾之摩陂明帝幸陂觀龍於是改摩陂曰龍陂其城曰龍城其水又南入於汝水汝水又東南與龍山水會水出龍山龍溪北流際父城縣故

城東昔楚平王大城城父以居太子建故杜預曰即襄城之城父縣也馮異據之以降世祖用報巾車之恩也

一清按城父城本是二縣漢志潁川郡父城縣下云應鄉故國沛郡城父縣下云夏肥水東南至下蔡入淮

莽曰思善續志父城屬潁川而城父改隸汝南故特著

曰城父故屬沛春秋時曰夷左氏傳云楚遷許于夷實

城父杜預注曰此時改城父為夷故傳實之又後漢書

馮異傳云潁川父城人也章懷注云父城縣名故城在

今許州葉縣東北汝州郟城縣有父城亦或謂之城父

元和郡縣志云父城故殷時應國左傳楚大城城父以

居太子建是也杜元凱恐後人誤以此城父為遷許之

舊故云即襄城之城父明以別于沛郡也史記正義云

潁川父城縣沛郡城父縣據郡屬縣其名自分斯言最核也

合俱出龍山北流注之又東北入於汝水汝水又東南

逕襄城縣故城南王隱晉書地道記曰楚靈王築劉向

說苑曰襄城君始封之日服翠衣帶玉佩徙倚于流水

之上即是水也楚大夫莊辛所說處後乃縣之呂后元

年立孝惠後宮子義為侯國王莽更名相城也黃帝嘗

遇牧童于其野故嵇叔夜讚曰奇矣難測襄城小童倦

遊六合來憩茲邦也其城南對汜城周襄王出鄭居汜

即是此城也春秋襄公二十六年楚伐鄭涉汜而歸杜

預曰涉汝水于汜城下也晉襄城郡治京相璠曰周襄

王居之故曰襄城也今置關于其下汝水又東南流逕

西不羹城南春秋左傳昭公十二年楚靈王曰昔諸侯

遠我而畏晉今我大城陳蔡不羹賦皆千乘諸侯其畏

我乎東觀漢記曰車騎馬防以前參藥勤勞省闕增封侯國襄城羹亭千二百五十戶即此亭也汝水又東南逕繁邱城南而東南出也

又東南過定陵縣北

湛水出犍縣北魚齒山西北東南流歷魚齒山下為湛浦方五十餘步春秋襄公十六年晉伐楚報楊梁之役楚公子格及晉師戰于湛阪楚師敗績遂侵方城之外今水北悉枕翼山阜于父城東南湛水之北山有長阪蓋即湛水以名阪故有湛阪之名也湛水又東南逕蒲城北京相璠曰昆陽縣北有蒲城蒲城北有湛水者是

也湛水又東於汝水九曲北東入汝杜預亦以是水為

湛水矣周禮荊州其浸潁湛鄭元云未聞蓋偶有不照

也今考地則不乖其土言水則有符經文矣一清按漢志註師古

曰潁水出陽城陽乾山宜屬豫州許慎又云湛水豫州浸蓋川土相鄰故也全氏曰周禮職方荊州之浸潁湛按湛是汝水支流而潁亦與汝互相出入之水也又豫州之浸波澁波亦汝水支流然則汝雖不見于禹貢而未嘗不重于職方康成既不知湛水汝水又東南逕定

陵縣故城北漢成帝元延三年封侍中衛尉淳于長為

侯國王莽更之曰定城矣東觀漢記曰光武擊王莽二

公還到汝水上于涯以手飲水澡頰塵垢謂傅俊曰今

日疲倦諸君寧憊也即是水也水右則澧水左入焉左

則百尺溝出矣溝水夾岸層崇亦謂之為百尺隄也自定陵城北通潁水於襄城縣潁盛則南播汝決則北注溝之東有澄潭號曰龍淵在汝北四里許南北百步東西二百步水至清深常不耗竭佳饒魚筍湖溢則東注澗水矣汝水又東南昆水注之水出魯陽縣唐山東南流逕昆陽縣故城西更始元年王莽徵天下能為兵法者選練武衛招募猛士旌旂輜重千里不絕又驅諸獷獸虎豹犀象之屬以助威武自秦漢出師之盛未嘗有也世祖以數千兵邀之陽關諸將見尋邑兵盛反走入昆陽世祖乃使成國上公王鳳廷尉大將軍王常留守

夜與十三騎出城南門收兵于鄧尋邑圍城數十重雲車十餘丈瞰臨城中積弩亂發矢下如雨城中人負戶而汲王鳳請降不許世祖率營部俱進頻破之乘勝以敢死三千人徑衝尋邑兵敗其中堅于是水之上遂殺王尋城中亦鼓譟而出中外合勢震呼動天地會大雷風屋瓦皆飛莽兵大潰昆水又屈逕其城南世祖建武中封侍中傅俊為侯國故後漢郡國志有昆陽縣蓋藉水以氏縣也

一清按漢志潁川郡昆陽縣應劭曰昆水出南陽

昆水又東逕定

陵城南又東注汝水汝水又東南逕奇頽城西北今南潁川郡治也瀆水出焉世亦謂之大瀆水爾雅曰河有

雍汝有瀆然則瀆者汝別也

全氏曰公羊子曰瀆泉者直泉也直泉者涌泉也釋

名本之其音讀如瀆謂自下而上也瀆則其聲之轉也後卷小隱水下有汾陂善長亦曰汾俗音糞蓋汾即瀆之通也詩曰遵彼汝墳蓋汝旁之水為瀆則汝旁之土亦為墳謂突起也如禹貢赤埴墳之墳毛公乃以大防解之非也觀孟子則汝水宜法不宜防也故其下夾水之邑猶流汝陽之名

是或瀆瀆之聲相近矣亦或下合瀆潁兼統厥稱耳

又東南過鄆縣北

汝水逕奇頷城西東南流其城襟帶兩水側背雙流汝

水又東南流逕鄆縣故城北故魏下邑也史記楚昭陽

伐魏取鄆是也汝水又東得醴水口水出南陽雒縣亦

云導源雒衡山即山海經云衡山也郭景純以為南嶽

非也馬融廣成頌曰面據衡陰指謂是山在雒縣界故

世謂之雒衡山依山海經不言有水焉然醴水東流歷

唐山下即高鳳所隱之山也醴水又東南與臯水合水

發臯山郭景純曰或作章山東流注於醴水醴水又東

南逕唐城北南入城而西流出城城蓋因山以即稱矣

醴水又屈而東南流逕葉縣故城北春秋昭公十五年

許遷于葉者也楚盛周衰控霸南土欲爭強中國多築

列城于北方以逼華夏故號此城為萬城或作方城唐

勒奏土論曰我是楚也世霸南土自越以至葉垂宏境

萬里故號曰萬城也余按春秋屈完之在召陵對齊侯

曰楚國方城以爲城杜預曰方城山名也在葉南未詳孰是楚惠王以封諸梁子高號曰葉公城卽子高之故邑也葉公好龍神龍下之河東王喬之爲葉令也每月望常自詣朝堂帝怪其來數而不見車騎顯宗密令太史伺望之言其臨至輒有雙鳧從東南飛來于是候鳧至舉羅張之但得一隻鳧乃詔尚方診視則四年中所賜尚書官屬履也每當朝時葉門下鼓不擊自鳴聞于京師後天下玉棺于堂前吏民推排終不搖動喬曰天帝獨欲召我耶乃沐浴服飾寢其中蓋便立覆宿昔葬于城東土自成墳其夕縣中牛皆流汗喘乏而人無知

者百姓爲立廟號葉君祠牧守每班錄皆先謁拜之吏民祈禱無不如應若有違犯亦立能爲祟帝乃迎取其鼓置都亭下畧無復聲焉或云卽古仙人王喬也是以于氏書之于神化醴水又逕其城東與燒車水合水西出苦菜山東流側葉城南而下注醴水醴水又東逕葉公廟北廟前有葉公子高諸梁碑舊秦漢之世廟道有雙闕几筵黃巾之亂殘毀頽闕魏太和景初中令長修飾舊宇後長汝南陳晞以正始元年立碑碑字破落遺文殆存事見其碑醴水又東與葉西陂水會縣南有方城山屈完所謂楚國方城以爲城者也山有湧泉北流

畜之以爲陂陂塘方二里陂水散流又東逕葉城南而
 東北注醴水醴水又東注葉陂陂東西十里南北七里
 二陂竝諸梁之所竭也陂水又東逕濩陽縣故城北又
 東逕定陵城南東與芹溝水合其水導源葉縣東逕濩
 陽城北又東逕定陵縣南又東南流注醴其水逕流昆
 醴之間纏絡四縣之中疑卽呂忱所謂混水也今於定
 陵更無別水唯是水可當之醴水東逕鄆縣故城南左
 入汝一清按漢志南陽郡雒縣醴水東至鄆入汝師古曰鄆音屋考醴水東至鄆縣入汝今河南許州鄆
 城縣是也鄆字誤耳師古更以屋音釋之廣韻集韻始出鄆字云地名在南陽皆爲謬也

山海經曰
 澧水東流注於視水也一清按郭璞註云或曰視宜爲親漢志南陽郡舞陰縣觀水所

出東至上蔡入汝全氏曰山經所云澧水注視澧乃濯字之訛濯水注觀澧水不注瀨也
 汝水又東
 南流逕鄧城西春秋左傳桓公二年蔡侯鄭伯會于鄧
 者也汝水又東南流濩水注之

又東南過汝南上蔡縣西

汝南郡楚之別也漢高祖四年置王莽改郡曰汝濱清一

按漢志汝南郡高帝置莽曰汝汾分爲賞都尉縣故蔡國周武王克殷封其弟

叔度于蔡世本曰上蔡也九江有下蔡故稱上竹書紀

年曰魏章率師及鄭師伐楚取上蔡者也永初元年安

帝封鄧騭爲侯國汝水又東逕懸瓠城北王智深云汝

南太守周矜起義于懸瓠者是矣今豫州刺史汝南郡

治城之西北汝水枝別左出西北流又屈西東轉又西南會汝形若垂瓠者彥云城北名馬灣中有地數頃上有栗園栗小殊不並固安之實也然歲貢三百石以充天府水渚即栗州也樹木高茂望若屯雲積氣矣林中有栗堂射埽甚閒敞牧宰及英彥多所游薄其城上西北隅高祖以太和中幸懸瓠平南王肅起高臺于小城建層樓于隅阿下際水湄降眺栗渚左右列榭四周參差競峙奇為佳觀也

又東南過平輿縣南

溱水出浮石嶺北青衣山亦謂之青衣水也東南逕朗

陵縣故城西應劭曰西南有朗陵山縣以氏焉世祖建

武中封城門校尉臧宮為侯國也溱水又南屈逕其縣

南又東北逕北宜春縣故城北王莽更名之為宣孱也

豫章有宜春故加北矣元初三年安帝封后父侍中閭

暢為侯國溱水又東北逕馬香城北又東北入汝汝水

又東南逕平輿縣南安城縣故城北王莽更名至成也

漢武帝元光六年封長沙定王子劉蒼為侯國矣一清按索

隱曰在豫章地理志豫章郡無此縣長沙國有安成縣非汝南之安成也汝水又東南汶水

首受慎水於慎陽縣故城南陂一清按漢志慎陽縣師古曰慎字本作慎音真

闕駟云永平五年失印更刻遂誤以水為心陂水兩分一水自陂北逶慎陽城

四圍城塹潁川荀淑遇縣人黃叔度于逆旅與語移日
 曰子吾師表也范奕論曰黃憲言論風旨無所傳聞然
 士君子見之者靡不服深遠去疵吝將以道周性全無
 得而稱乎塹水又自瀆東北流注北陂一水自陂東北
 流積為鰲陂陂水又東北又結而為陂世謂之窖陂陂
 水上承慎陽縣北陂東北流積而為土陂陂水又東為
 窖陂陂水又東南流注壁陂陂水又東北為太陂陂水
 又東入汝汝水又東南逕平陵亭北又東南逕陽遂鄉
 北汝水又東逕櫟亭北春秋之棘櫟也杜預曰汝陰新
 蔡縣東北有櫟亭今城在新蔡故城西北城北半淪水

汝水又東南逕新蔡縣故城南昔管蔡閒王室放蔡叔
 而遷之其子胡能率德易行周公舉之為魯卿士以見
 于王王命之以蔡申呂地也以奉叔度祀是為蔡仲矣
 宋忠曰故名其地為新蔡王莽所謂新遷者也世祖建
 武元年封吳國為侯國

一清按後漢書吳漢傳國封在建武二十八年此云元年誤也

汝南先賢傳曰新蔡鄭敬字次都為郡功曹都尉高懿
 廳事前有槐樹白露類甘露者懿問掾屬皆言是甘露
 敬獨曰明府政未能致甘露但樹汁耳懿不悅託疾而
 去汝水又東南左會瀝水水上承汝水別流於奇頷城
 東東南流為練溝逕召陵縣西東南流注上蔡西岡北

為黃陵陂陂水東流於上蔡岡東為蔡塘又東逕平輿

縣故城南為澧水一清按說文澧水出汝南上蔡黑閭澗入汝縣舊沈國也

有沈亭春秋定公四年蔡滅沈以沈子嘉歸後楚以為

縣史記曰秦將李信攻平輿敗之者也建武三十年世

祖封銚統為侯國朱氏謀璋箋曰後漢書銚期傳子統封建平侯非平輿本汝南

郡治昔費長房為市吏見王壺公縣壺郡市長房從之

因而自遠同入此壺隱淪仙路骨謝懷靈無會而返雖

能役使鬼神而終同物化城南里餘有神廟世謂之張

明府祠水旱之不節則禱之廟前有圭碑文字紊碎不

可復尋碑側有小石函按桂陽先賢畫讚臨武張熹字

季智為平輿令時天大旱熹躬禱雩未獲嘉應乃積柴

自焚主簿侯崇小史張化從熹焚焉火既燎天靈感應

即澍雨此熹自焚處也澧水又東南左迤為葛陂陂方

數十里水物含靈多所苞育昔費長房投杖于陂而龍

變所在也又劾東海君于是陂矣陂水東出為鮦水俗

謂之三丈陂亦曰三嚴水水逕鮦陽縣故城南應劭曰

縣在鮦水之陽一清按漢志汝南郡鮦陽縣孟康曰音

糾此是缺誤師古章懷音訓並承其失據太平寰宇記蔡州新蔡縣下云鮦音糾紅反漢明帝

說文鮦直龍切此與糾紅之音相近為可證也漢明帝

永平中封衛尉陰興子慶為侯國也縣有葛陵城建武

十五年更封銚侯銚丹為侯國全氏曰丹以安徒封非銚城之東

北有楚武王家民謂之楚王琴

一清按皇覽曰民謂之楚王岑蓋山陵之異名

城北祝社里下土中得銅鼎銘曰楚武王是知武王隧

也鮑陂東注為富水水積之處謂之陂塘津渠交絡枝

布川隰矣澆水自葛陂東南逕新蔡縣故城東而東南

流注於汝水又東南逕下桑里左迤為橫塘陂又東北

為青陂者也汝水又東南逕壺邱城北故陳地春秋左

傳文公九年楚侵陳剋壺邱以其服于晉是也汝水又

東與青陂合水上承慎水於慎陽縣之上慎陂右溝北

注馬城陂陂西有黃邱亭陂水又東逕新息亭北又東

為綢陂陂水又東逕新息縣結為墻陂陂水又東逕遂

鄉東南而為壁陂又東為青陂陂東對大呂亭春秋外

傳曰當成周者南有荆蠻申呂姜姓矣蔡平侯始封也

西南有小呂亭故此稱大也側陂南有青陂廟廟前有陂

漢靈帝建寧三年新蔡長河南緱氏李言上請修復青

陂司徒臣訓尚書臣龔奏可洛陽宮于青陂東塘南樹

碑碑稱青陂在縣坤地源起桐柏淮川別流入于潺湲

逕新息牆陂衍入褒信界灌溉五百餘頃陂水又東分

為二水一水南入淮一水東南逕白亭北又東逕吳城

南史記楚惠王二年子西召太子建之子勝于吳勝入

居之故曰吳城也又東北屈逕壺邱東而北流注於汝

水世謂之薄谿水汝水又東逕褒信縣故城北而東注矣

又東至原鹿縣

汝水又東南逕原鹿縣故城西杜預釋地曰汝陰有原

鹿縣也

南入於淮

所謂汝口側水有汝口戍淮汝之交會也

水經注釋卷二十一終

水經注釋卷二十二

仁和趙一清誠夫錄

又東南穎水

洧水

澗水

澮水

渠水

穎水出穎川陽城縣西北少室山

秦始皇十七年滅韓以其地為穎川郡蓋因水以著稱者也漢高帝二年以為韓國王莽之左隊也山海經曰

穎水出少室山地理志日出陽城縣陽乾山今穎水有

三源奇發右水出陽乾山之穎谷春秋穎考叔為其封

人其水東北流中水導源少室通阜東南流逕負黍亭

東春秋定公六年鄭伐馮滑負黍者也馮敬通顯志賦曰求善卷之所在遇許由于負黍京相璠曰負黍在潁川陽城縣西南二十七里世謂之黃城也亦或謂是水為灑水東與右水合左水出少室南谿東合潁水故作者乃舉二三言水所發也呂氏春秋曰卞隨恥受湯讓自投此水而死張顯逸民傳嵇叔夜高士傳竝言投河水而死未知其孰是也

又東南過其縣南

潁水又東五渡水注之其水導源崇高縣東北太室東谿縣漢武帝置以奉太室山俗謂之崧陽城及春夏雨

泛水自山頂而迭相灌澍嶠流相承為二十八浦也暘旱輟津而石潭不耗道路遊憩者唯得飡飲而已無敢澡盥其中苟不如法必數日不豫是以行者憚之山下大澤周數里而清深肅潔水中有立石高十餘丈廣二十許步上甚平整緇素之士多泛舟昇陟取暢幽情其水東流逕陽城西石溜縈委溯者五涉故亦謂之五渡水東南流入潁水潁水逕其縣故城南昔舜禪禹禹避商均伯益避啓竝于此也亦周公以土圭測日景處漢成帝永始元年封趙臨為侯國也

沈氏曰本表封成陽不封陽城成陽屬汝

南不屬潁川 縣南對箕山山上有許由冢堯所封也故太史

公曰余登箕山之上有許由墓焉山下有牽牛墟側潁水有犢泉是巢父還牛處也石上犢跡存焉又有許由廟碑闕尙存是漢潁川太守朱寵所立潁水逕其北東與龍淵水合其水導源龍淵東南流逕陽城北又東南入于潁潁水又東平洛溪水注之水發玉女臺下平洛澗世謂之平洛水呂忱所謂勺水出陽城山蓋斯水也又東南流注于潁潁水又東出陽關歷康亭城南魏明帝封尙書右僕射衛臻爲康鄉侯此卽臻封邑也

又東南過陽翟縣北

潁水東南流逕陽關聚聚夾水相對俗謂之東西二土

城也潁水又逕上棘城西又屈逕其城南春秋左傳襄公十八年楚師伐鄭城上棘以涉潁者也縣西有故堰堰石崩禱頽基尙存舊遏潁水枝流所出也其故瀆東南逕三封山北今無水渠中又有泉流出焉時人謂之嵎水東逕三封山東東南歷大陵西連山亦曰啓筮亭啓亭神于大陵之上卽鈞臺也春秋左傳曰夏啓有鈞臺之饗是也杜預曰河南陽翟縣南有鈞臺其水又東南流水積爲陂陂方十里俗謂之鈞臺陂蓋指鈞臺取名也又西南流逕夏亭城西又屈而東南爲郟之摩陂潁水自竭東逕陽翟縣故城北夏禹始封于此爲夏國

故武王至周曰吾其有夏之居乎遂營洛邑徐廣曰河南陽城陽翟則夏地也春秋經書秋鄭伯突入于櫟左傳曰桓公十五年突殺檀伯而居之服虔曰檀伯鄭守櫟大夫櫟鄭之大都宋忠曰今陽翟也周末韓景侯自新鄭徙都之王隱曰陽翟本櫟也故潁川郡治也城西有郭奉孝碑側水有九山祠碑叢柏猶茂北枕川流也又東南過潁陽縣西又東南過潁陰縣西南漢書地理志應劭曰縣在潁水之陽故邑氏之按東觀漢記漢封車騎將軍馬防爲侯國防城門校尉位在九卿上絕席潁水又南逕潁鄉城西潁陰縣故城在東北舊許昌典農

都尉治也後改爲縣魏明帝封侍中辛毗爲侯國也潁水又東南逕柏祠曲東歷罍邱城南故汾邱城也春秋左傳襄公十八年楚子庚治兵于汾司馬彪曰襄城縣有汾邱杜預曰在襄城縣之東北也逕繁昌故縣北曲蠡之繁陽亭也魏書國志曰文帝以漢獻帝延康元年行至曲蠡登壇受禪于是地改元黃初其年以潁陰之繁陽亭爲繁昌縣城內有三臺時人謂之繁昌臺壇前有二碑昔魏文帝受禪于此自壇而降曰舜禹之事吾知之矣故其石銘曰遂于繁昌築靈壇也於後其碑六字生金論者以爲司馬金行故曹氏六世遷魏而事晉

也潁水又東南流逕青陵亭城北北對青陵陂陂縱廣二十里潁水逕其北枝入為陂陂西則澮水注之水出

襄城縣之邑城下東流注于陂陂水又東入臨潁縣之

狼陂潁水又東南流而歷臨潁縣也名勝志引水經注曰潁水又東逕參

龍城即古參龍氏之邑也城西有拒陵岡今本無之一清按寰宇記云參龍城在臨潁縣西四十里北周書泉

企傳拒陽人杜窟即拒陵也古陽陵字每互用方輿紀要許州臨潁縣有大陵城引注文正同大陵見上陽翟

縣及潁水注中

又東南過臨潁縣南又東南過汝南潁強縣北洧水從河

南密縣東流注之

臨潁舊縣也潁水自縣西注小潁水出焉爾雅曰潁別

為沙郭景純曰皆大水溢出別為小水之名也亦猶江

別為沱也潁水又東南逕舉城北即古臯城亭矣春秋

經書公及諸侯盟于臯鼬者也臯舉字相似名與字乖

耳潁水又東逕潁陽城南竹書紀年曰孫何取潁陽潁

強城在東北潁水不得逕其北潁水又東南潁水入焉

非洧水也

又東過西華縣北

王莽更名之曰華望也有東故言西矣世祖光武皇帝

建武中封鄧晨為侯國漢濟北戴封字平仲為西華令

遇天旱慨治功無感乃積柴坐其上以自焚火起而大

雨暴至遠近歎伏永元十三年徵太常焉縣北有習陽城潁水逕其南也經所謂洧水流注之也

又南過女陽縣北

縣故城南有汝水枝流故縣得厥稱矣闕駟曰本汝水別流其後枯竭號曰死汝水故其字無水余按汝女乃方俗之音故字隨讀改未必一如闕氏之說以窮通損字也潁水又東大灑水注之又東南逕博陽縣故城東城在南頓縣北四十里漢宣帝封邴吉為侯國王莽更名樂嘉

一清按漢志作樂家

又東南過南頓縣北灑水從西來流注之

灑水于樂嘉縣入潁不至于頓頓故頓子國也周之同姓春秋僖公二十五年楚伐陳納頓子于頓是也俗謂之潁陰城非也潁水又東南逕陳縣南又東南左會交口者也

又東南至新陽縣北蕩蕩渠水從西北來注之

經云蕩蕩渠者百尺溝之別名也南合交口新溝自是東出潁上有堰謂之新陽堰俗謂之山陽竭非也新溝自潁北東出縣在水北故應劭曰縣在新水之陽今縣故城在東明潁水不出其北蓋經誤耳潁水自堰東南流逕項縣故城北春秋僖公十七年魯滅項是矣潁水

又東右合谷水水上承平鄉諸陂東北逕南頓縣故城南側城東注春秋左傳所謂頓迫于陳而奔楚自頓徙南故曰南頓也今其城在頓南三十餘里又東逕項城中楚襄王所郭以為別都都內西南小城項縣故城也舊潁州治谷水逕小城北又東逕魏豫州刺史賈逵祠北王隱言祠在城北非也廟在小城東昔王凌為宣王司馬懿一清按三所執屆廟而歎曰賈梁道王凌魏之忠臣唯汝有靈知之遂仰鴆而死廟前有碑碑石生金干寶曰黃金可採為晉中興之瑞谷水又東流出城東注潁潁水東側有公路城袁術所築也故世因以術字

名城矣潁水又東逕臨潁城北城臨水闕南面又東逕雲陽二城間南北翼水竝非所具又東逕邱頭邱頭南

枕水魏書郡國志曰宣王軍次邱頭王凌面縛水次故

號武邱矣厄林曰司馬懿雖嘗討王凌至邱頭而武邱之名至司馬昭克諸葛誕始改本注誤潁

水又東南流於故城北細水注之一清按細水說文作洶从水臼聲水

上承陽都陂陂水枝分東南出為細水東逕新陽縣故

城北又東南逕宋縣故城北縣即所謂鄆邱者也秦伐

魏取鄆邱謂是邑矣漢成帝綏和元年詔封殷後于沛

以存三統平帝元始四年改曰宋公章帝建初四年徙

邑于此故號新鄆為宋公國也王莽之新延矣細水又

南逕細陽縣新溝水注之新溝水首受交口東北逕新陽縣故城南漢高帝六年封呂青為侯國王莽更名曰新明也故應劭曰縣在新水之陽今無水故渠舊道而已東入澤渚而散流入細細水又東南逕細陽縣故城南王莽更之曰樂慶也世祖建武中封岑彭子遵為侯國細水又東南積而為陂謂之次塘公私引裂以供田漑又東南流屈而西南入潁地理志曰細水出細陽縣東南入潁一清按今漢志無是文師古曰居細水之陽故曰細陽細水出新鄴潁水又東南流逕胡城東故胡子國也春秋定公十五年楚滅胡以胡子豹歸是也杜預釋地曰女陰縣西北有胡城也

潁水又東南汝水枝津注之水上承汝水別瀆于奇潁城東三十里世謂之大灑水也東南逕召陵縣故城南春秋左傳僖公四年齊桓公師于召陵責楚貢不入即此處也城內有大井徑數丈水至清深闕駟曰召者高也其地邱墟井深數丈故以名焉又東南逕征羌縣故召陵縣之安陵鄉安陵亭也世祖建武十一年以封中郎將來歙歙以征定西羌功故更名征羌也一清按後漢書來歙傳曰以歙有平羌隴之功故改汝南之當鄉縣為征羌國焉漢志汝南郡無此縣名續志云汝南郡召陵縣有安陵鄉征羌侯國有安陵亭與闕駟引戰國策以為秦酈注合本傳之云所未詳也昭王欲易地謂此也一清按地理志僑陵李奇曰六國為安陵在潁川不在汝南汝

水別瀆又東逕公路臺北臺臨水百步袁術所築也汝水別瀆又東逕西門城即南利也漢宣帝封廣陵厲王子劉昌為侯國縣北三十里有孰城號曰北利故瀆出于二利之間間關女陽之縣世名之曰死汝縣取水名故曰女陽也又東逕南頓縣故城北又東南逕鮑陽城北又東逕邸鄉城北又東逕固始縣故城北地理志縣故瀆也瀆邱在南故藉邱名縣矣全氏曰按漢志汝南郡有瀆縣應劭以為瀆邱故劉奉世疑之曰既別有固始則此瀆疑更一地予謂非也睢陽之固始與瀆本一地而分為二縣漢王追項羽至固陵晉灼曰即固始也師古曰後改為固始耳地理志屬淮陽續志光武改瀆為固始而淮陽之固始則并省陳之陽夏故陽夏有固陵聚劉昭補注引晉灼云汝南固始

縣以實之則二縣本相接也又何疑乎瀆之更是一地乎但今漢志則無固始故瀆之文未知所據也王莽更名之曰閏治孫叔敖以土浸薄取而為封故能縣

嗣城北猶有叔敖碑建武二年司空李通又慕叔敖受邑故光武以嘉之更名固始別汝又東逕蔡岡北岡上

有平陽侯相蔡昭冢昭字叔明周后稷之胄冢有石闕

闕前有二碑碑字淪碎不可復識羊虎傾低殆存而已枝汝又東北流逕胡城南而東歷女陰縣故城西北東

入潁水潁水又東逕女陰縣故城北史記高祖功臣侯者年表曰高祖六年封夏侯嬰為侯國王莽更名之曰

汝墳也縣在汝水之陰故以汝水納稱城西有一城故

陶邱鄉也汝陰郡治全氏曰晉志汝陰郡魏置首汝陰縣後魏志汝陰郡晉武帝置治社

亭城外東北隅有舊臺翼城若邱俗謂之女郎臺雖經

頽毀猶自廣崇上有一井疑故陶邱鄉所未詳

又東南至慎縣東南入于淮

潁水東南流左合上吳百尺二水俱承次塘細陂南流

注于潁潁水又東南江陂水注之水受大滌陂陂水南

流積為江陂南逕慎城西側城南流入于潁潁水又逕

慎縣故城南縣故楚邑白公所居以拒吳春秋左傳哀

公十六年吳人伐慎白公敗之王莽之慎治也世祖建

武中封劉賜為侯國潁水又東南逕蜩螗郭東俗謂之

鄭城矣一清按功臣侯表宣帝神爵三年封鄭吉為安遠侯表云慎縣知此城為吉封邑也又東

南入于淮春秋昭公十二年楚子狩于州來次于潁尾

蓋潁水之會淮也

洧水出河南密縣西南馬領山

水出山下亦言出潁川陽城山一清按此是班固說山在陽城縣

之東北蓋馬領之統目焉洧水東南流逕一故臺南俗

謂之陽子臺又東逕馬領塢北塢在山上塢下泉流北

注亦謂洧別源也而入于洧水洧水東流綏水會焉水

出方山綏谿即山海經所謂浮戲之山也東南流逕漢

宏農太守張伯雅墓塋域四周壘石為垣隅阿相降列

於綏水之陰庚門表二石闕夾對石獸於闕下冢前有石廟列植三碑碑云德字伯雅河南密人也碑側樹兩石人有數石柱及諸石獸矣舊引綏水南入瑩域而為池沼沼在丑地皆蟾螭吐水石隍承溜池之南又建石樓石廟前又翼列諸獸但物謝時淪凋毀殆盡夫富而非義比之浮雲況復此乎王孫士安斯為達矣綏水又東南流逕上郭亭南東南注洧洧水又東襄荷水注之水出北山子節谿亦謂之子節水東南流注于洧洧水又東會瀝滴泉水出深谿之側泉流丈餘懸水散注故世士以瀝滴稱南流入洧水也

又東南過其縣南

洧水又東南流與承雲二水合俱出承雲山二源雙導東南流注于洧世謂之東西承雲水洧水又東微水注之水出微山東北流入于洧洧水又東逕密縣故城南春秋謂之新城左傳僖公六年會諸侯伐鄭圍新密鄭所以不時城也今縣城東門南側有漢密令卓茂祠茂字子康南陽宛人溫仁寬雅恭而有禮人有認其馬者茂與之曰若非公馬幸至丞相府歸我遂挽車而去後馬主得馬謝而還之任漢黃門郎遷密令舉善而教口無惡言教化大行道不拾遺蝗不入境百姓為之立祠

享祀不輟矣洧水又左會瓊泉水水出玉亭西北流注于洧洧水又東南與馬關水合水出玉亭下東北流歷馬關謂之馬關水又東北注于洧洧水又東合武定水水北出武定岡西南流又屈而東南流逕零鳥塢西側塢東南流塢側有水懸流赴壑一匹有餘直注澗下淪積成淵嬉遊者矚望奇為佳觀俗人覩此水挂于塢側遂目之為零鳥水東南流入于洧洧水又東與虎贖山水合水發南山虎贖谿東北流入洧洧水又東南赤澗水注之水出武定岡東南流逕皇臺岡下又歷岡東東南流注于洧洧水又東南流潛水注之洧水又東南逕

鄆城南世本曰陸終娶于鬼方之妹謂之女隤朱氏箋引世本

作女是生六子孕三年啓其左脅三人出焉破其右脅

三人出焉其四曰求言是為鄆人鄆人者鄭是也按史

記楚世家陸終生子六人四曰會人裴駟集解引世本日會人者鄭是也鄭字誤當作鄆小司馬索隱曰系本云四曰求言是為鄆人毛詩正義曰陸終生子六人四曰會人案世本會人即檜之祖也鄭桓公問

于史伯曰王室多難予安逃死乎史伯曰號鄆公之民

遷之可也鄭氏東遷號鄆獻十邑焉劉楨云鄆在豫州

外方之北北鄰于號都滎之南左濟右洛居陽鄭兩水

之間全氏曰考潛洧之交竝無陽水但有陰水耳左傳陰阪陰口是也古文陽从陽陰从阴字近致訛

食潛洧焉徐廣曰鄆在密縣妘姓矣不得在外方之北

也洧水又東逕陰坂北水有梁焉俗謂是濟為參辰口
 左傳襄公九年晉伐鄭濟于陰坂次于陰口而還是也
 杜預曰陰坂洧津也服虔曰水南曰陰口者水口也參
 陰聲相近蓋傳呼之謬耳又晉居商參之分實沈之士
 鄭處辰火之野闕伯之地軍師所次故濟得其名也全氏
曰按商參孫汝澄云當作觜參何焯曰非也參當作畢
 說文畢商星也非二十八宿之參唐韻讀作所今切予
 謂義門以說文立異而不細讀此注夫商星之畢何以
 亦為實沈之主乎且畢為晉分見于何書况善長引服
 氏語謂參陰聲相近今改而為所今切幾何不千里而
 遙也然則尚不如孫說之近是矣且善長此數語本屬
 傳會以晉為實沈之士而軍師所次即以名其水口固
 未必然若鄭何嘗是闕伯之士乎此不足深辨者也

又東過鄭縣南澗水從西北來注之

洧水又東逕新鄭縣故城中左傳襄公元年晉韓厥荀

偃帥諸侯伐鄭入其郛敗其徒兵於洧上是也竹書紀

年晉文侯二年同惠王子多父伐鄆克之乃居鄭父之

邱名之曰鄭是曰桓公一清按漢志河南郡新鄭縣應

劭引國語曰周幽王敗桓公死

之其子武公與平王東遷洛邑遂伐虢儉而并其地而

邑于此京兆尹鄭縣應劭曰宣王母弟友所封也其子

與平王東遷更稱新鄭史記鄭世家桓公初封于鄭索

隱引系本云桓公居減林徙拾宋忠曰減林與拾皆舊

地名是封桓公乃名為鄭耳然則居鄭父之邱者是桓

公之子武公而誤以為桓公者蓋竹書之謬道元于渭

水篇已詳辨之皇甫士安帝王世紀云或言縣故有熊氏之墟

時門之外洧淵則此潭也今洧水自鄭城西北入而東南流逕鄭城南城之南門內舊外蛇與內蛇鬪內蛇死六年大夫傅瑕殺鄭子入厲公自是徵也水南有鄭莊公望母臺莊姜惡公寤生與段京居段不弟姜氏無訓莊公居夫人于城穎誓曰不及黃泉無相見也故成臺以望母用伸在心之思感考叔之言析大隧之賦洩洩之慈有嘉融融之孝得常矣洧水又東與黃水合經所謂澮水非也黃水出太山南黃泉東南流逕華城西史伯謂鄭桓公曰華君之士也韋昭曰華國名矣史記秦昭王三十三年白起攻魏拔華陽走芒卯斬首十五萬

司馬彪曰華陽亭名在密縣嵇叔夜嘗採藥于山澤學琴于古人即此亭也黃水東南流又與上水合水出兩塘中一源兩分泉流派別東為七虎澗水西流即是水也其水西南流注于黃水黃即春秋之所謂黃崖也故杜預云苑陵縣西有黃水者也又東南流水側有二臺也謂之積粟臺臺東即二水之會也捕獐山水注之水東出捕獐山西流注于黃水黃水又南至鄭城北東轉於城之東北與黃溝合水出捕獐山東南流至鄭城東北入黃水黃水又東南逕龍淵泉東南七里溝水注之水出隙候亭東南平地東注又屈而南流逕升城東又

其一清按此處有脫誤南歷燭城西即鄭大夫燭之武邑也又南流注于洧水也

又東南過長社縣北

洧水東南流南濮北濮二水入焉洧水又東南與龍淵水合水出長社縣西北有故溝上承洧水水盛則通注龍淵水減則津渠輟流其瀆中澁泉南注東轉為淵淥水平潭清潔澄深俯視遊魚類若乘空矣所謂淵無潛鱗也又東逕長社縣故城北鄭之長葛邑也春秋隱公五年宋人伐鄭圍長葛是也後社樹暴長故曰長社魏潁川郡治也余以景明中出宰茲郡於南城西側修立

客館版築既興於土下得一樹根甚壯大疑是故社怪

長暴茂者也稽之故說縣無龍淵水名蓋出近世矣京

相璠春秋土地名曰長社北界有稟水但是水導於隍

塹之中非北界之所謂又按京杜地名竝云長社縣北

有長葛鄉斯乃縣徙于南矣然則是水即稟水也其水

又東南逕棘城北左傳所謂楚子伐鄭救齊次于棘澤

者也稟水又東左注洧水洧水又東南分為二水也其

枝水東北流注沙一水東逕許昌縣故許男國也姜姓

四岳之後矣穆天子傳所謂天子見許男于洧上者也

漢章帝建初四年更封馬光為侯國春秋佐助期曰漢

以許昌失天下及魏承漢歷遂改名許昌也城內有景福殿基魏明帝太和中造準價八百餘萬洧水又東入汶倉城內俗以是水為汶水故有汶倉之名非也蓋洧水之邱閣耳洧水又東逕僞陵縣故城南李奇曰六國為安陵也昔秦求易地唐且受使于此春秋分記曰鄢陵六年晉敗楚于鄢陵即此六國時曰安陵兩漢晉為鄢陵縣俱屬潁川郡按後漢志曰春秋時曰鄢注曰克段于鄢晉敗楚于鄢陵釋例亦然知其為鄭之鄢無疑惟是漢陳畱郡有曰僞王莽所易為順通在東漢屬梁國者是也應劭于前漢志誤以陳畱之僞為克段之鄢水經據以為正謂克段于僞其地在漢陳畱杜預誤作潁川鄢陵蓋從應劭注耳此自應誤何得云杜誤乎一清按今本水經注浚儀渠其一者東南過陳縣也下及睢水出梁郡僞縣卷中俱無克段之文克齋所引豈無明據耶蓋是書多缺失耳寰宇記鄢城在宋州柘城縣北

二十九里春秋時寔陳株野地鄭伯克段之鄢在潁川不在陳畱也漢高帝十二年封都尉諸漚為侯國王莽更名左亭洧水又東僞陵陂水注之水出僞陵南陂東南流注于洧水也

又東南過新汲縣東北

洧水自僞陵東逕桐邱南俗謂之天井陵又曰岡非也洧水又屈而南流水上有梁謂之桐門橋蓋藉桐邱以取稱亦言取桐門亭而目焉然不知亭之所在未之詳也洧水又東南逕桐邱城春秋左傳莊公二十八年楚伐鄭鄭人將奔桐邱即此城也杜預春秋釋地曰潁川許昌城東北京相璠曰鄭地也今國無而城見存西南

去許昌故城可三十五里俗名之曰隄其城南即長堤
 固洧水之北防也西面桐邱其城邪長而不方蓋憑邱
 之稱即城之名矣洧水又東逕新汲縣故城北漢宣帝
 神爵二年置于許之汲鄉曲洧城以河內有汲縣故加
 新也漢章帝建初四年封執金吾馬光為侯國沈氏曰按後漢書本傳馬光無新汲之封而建初四年所封即許昌也已見上文此蓋復出之錯簡城在洧水南
 隄上又東洧水右迤為濩陂洧水又逕匡城南扶溝之
 匡亭也又東洧水左迤為鴨子陂謂之大穴口也
 又東南過茅城邑之東北

洧水自大穴口東南逕洧陽城西南逕茅城東北又南

左合甲庚溝溝水上承洧水於大穴口東北枝分東逕
 洧陽故城南俗謂之復陽城非也蓋洧復字類音讀變
 漢建安中封司空祭酒郭奉孝為侯國其水又東南為
 鴨子陂陂廣一十五里餘波南入甲庚溝西注洧東北
 瀉沙洧水又南逕一故城西世謂之思鄉城西去洧十
 五里洧水又右合濩陂水上承洧水於新汲縣南逕新
 汲縣故城東又南積而為陂陂之西北即長舍城全氏曰長舍即長社之變陂水東翼洧隄西面茅邑自城北門列築隄道
 迄于此岡世尚謂之茅岡即經所謂茅城邑也陂水北
 出東入洧津西北納潁流

又東過習陽城西折入于潁

洧水又東南逕辰亭東俗謂之田城非也蓋田辰聲相近城亭音韻聯故也經書魯宣公十一年楚子陳侯鄭伯盟於辰陵也京相璠曰潁川長平有故辰亭杜預曰長平縣東南有辰亭今此城在長平城西北長平城在東南或杜氏之謬傳書之誤耳長平東南淋陂北畔有一阜東西減里南北五十許步俗謂之新亭臺又疑是杜氏所謂辰亭而未之詳也洧水又南逕長平縣故城西王莽之長正也洧水又南分爲二水枝水東出謂之五梁溝逕習陽城北又東逕赭邱南邱上有故城郡國

志曰長平故屬汝南縣有赭邱城卽此城也又東逕長平城南東注滂陂洧水南出謂之雞籠水故水會有籠口之名矣洧水又東逕習陽城西西南折入潁地理志曰洧水東南至長平縣入潁者也

潧水出河南密縣大騮山

大騮卽具茨山也黃帝登具茨之山升于洪隄之上受神芝圖于黃蓋童子卽是山也潧水出其阿流而爲陂俗謂之玉女池東逕陘山北史記魏襄王六年敗楚于陘山者也山上有鄭祭仲冢冢西有子產墓累石爲方墳墳東有廟竝東北向鄭城杜元凱言不忘本際廟舊

有一枯柏樹其塵根故株之上多生稚柏列秀青青望之奇可嘉矣渙水又東南逕長社縣故城西北南渙北渙二水出焉劉澄之著永初記云水經渙水源出大騶山東北流注泗衛靈聞音於水上殊為乖矣余按水經為渙水不為渙也是水首受渙水川渠雙引俱東注有洧與之過沙枝流派亂互得通稱是以春秋昭公九年遷城父人於陳以夷渙西田益之京相璠曰以夷之渙西田益也杜預亦言以夷田在渙水西者與城父人服虔曰渙水名也且字類音同津瀾邈別不得為北渙上源師氏傳音於其上矣渙水又南逕鍾亭西又南逕皇

亭又東南逕關亭西又東南逕宛亭西鄭大夫宛射犬之故邑也渙水又南分為二水一水南出逕胡城東故潁陰縣之狐人亭也其水南結為陂謂之胡城陂渙水自枝渠東逕曲強城東皇陂水注之水出西北皇臺七女岡北皇陂即古長社縣之濁澤也史記魏惠王元年

韓懿侯與趙成侯合軍伐魏戰于濁澤是也方輿紀要云濁澤括

地志云出解縣東北平地即涿水涿音濁史記趙成侯六年伐魏取涿澤魏世家魏惠王元年韓懿侯趙成侯合兵伐魏戰于濁澤大破之遂圍魏是時魏都安邑或以為河南之濁澤誤也一清按史記韓世家注云徐廣曰長社有濁澤其陂水寰宇記尉氏縣下引水經注云

鄆說蓋有所據北對雞鳴城一清魏惠王元年韓懿侯會伐魏于北對雞鳴城即長社縣之濁

城也陂水東南流逕胡泉城北故潁陰縣之狐宗鄉也
又東合胡城陂水水上承皇陂水而東南流注于黃水
謂之合作口而東逕曲強城北東流入潁水時人謂之

勅水非也勅潁音相類故字從聲變耳一清按說文潁水出河南密縣

大隗山南入潁从水異聲與職切與水經合又有潁水
出河南密縣東入潁从水翼聲與職切潁音同而字

相近其源委又同豈卽一水而重出者與惟其
為與職切故與勅音相類若讀作異相去遠矣

逕東西二武亭間兩城相對疑卽古之岑門史遷所謂

走犀首于岑門者也徐廣曰潁陰有岑亭未知是否沈氏

曰續志潁陰縣有岸門史記魏世家哀王五年走犀首

于岸門徐廣曰潁陰有岸亭張守節曰括地志云岸門
在長社縣西北二十八里今名西武亭然則岑字誤也
索隱引劉昭曰河東皮氏縣有岸頭亭蓋為謬矣一清

按漢書衛青傳張次公封岸頭侯晉灼曰河東皮氏亭
也顧景范曰岸頭亭在河津縣南古岸門也史記秦孝

公二十四年與晉戰于岸門虜其將魏錯又惠文王後
十一年敗韓于岸門斬首十萬魏世家襄王五年秦使

樗里子伐取我曲沃走犀首于岸門今河津漢
皮氏縣地與曲沃近河東亦有岸門因致斯誤

南逕射犬城東卽鄭公孫射犬城也蓋俗謬耳潁水又

南逕潁陰縣故城西魏明帝封司空陳羣為侯國其水

自城西又東逕許昌城南又東南與宣梁陂水合陂水

上承狼陂於潁陰城西南陂南北二十里東西十里春

秋左傳曰楚子伐鄭師于狼淵是也其水東南入許昌

縣逕巨陵城北鄭地也春秋左氏傳莊公十四年鄭厲
公獲傅瑕于大陵京相璠曰潁川臨潁縣東北二十五

里有故巨陵亭古大陵也其水又東積而為陂謂之宣

梁陂也陂水又東南入澠水澠水又西南流逕陶城西

又東南逕陶陂東

東南入于潁

澠水出鄭縣西北平地

全氏曰按澠水說文以出桂陽臨武者當之而水經注汝水篇亦有

出平輿之澠水若其出鄭縣者說文以為澠水其音如澠其字不作澠也不知何時盡毛詩外傳國語孟子史漢諸

書之澠胥改為澠猶幸水經存其舊稍畱說文之學

澠水出鄆城西北雞絡塢下東南流逕賈復城西東南

流左合澠水水出賈復城東南流注于澠澠水又南左

會承雲山水水出西北承雲山東南歷渾子岡東注世

謂岡峽為五鳴口東南流注于澠澠水又東南流歷下

田川逕鄆城西謂之為柳泉水也故史伯答桓公曰君

以成周之衆奉辭伐罪若尅虢鄆君之土也如前華後

河右洛左濟主芣騶而食澠洧修典刑以守之可以少

固即謂此矣澠水又南懸流奔壑崩注丈餘其下積水

成潭廣四十許步淵深難測又南注于洧

全氏曰按澠水不得入洧

道元已詳辨之則此詩所謂澠與洧者也世亦謂之為

鄆水也

春秋分記曰鄭之澠水故會國居之亦曰澠水是也

東過其縣北又東南過其縣東又南入于洧水

自鄆澠東南更無別瀆不得逕新鄭而會洧也鄭城東

入洧者黃崖水也蓋經誤證耳一清按此條又不錯則知上注必無注洧之說
渠出滎陽北河東南過中牟縣之北

風俗通曰渠者水所居也渠水自河與沛亂流東逕滎澤北東南分沛歷中牟縣之圃田澤北與陽武分水澤多麻黃草故述征記曰踐縣境便覩斯卉窮則知踰界今雖不能然諒亦非謬詩所謂東有圃草也皇武子曰鄭之有原圃猶秦之有具囿澤在中牟縣西西限長城東極官渡北佩渠水東西四十許里南北二百許里中有沙岡上下二十四浦津流逕通淵潭相接各有名焉有大斬小斬大灰小灰義魯練秋大白楊小白楊散嚇

禺中羊圈大鵠小鵠龍澤密羅大哀小哀大長小長大縮小縮伯邱大蓋牛眠等浦水盛則北注渠溢則南播故竹書紀年梁惠成王十年入河水于甫田又為大溝而引甫水者也又有一瀆自酸棗受河導自漢瀆歷酸棗逕陽武縣南出世謂之十字溝而屬於渠或謂是瀆為梁惠之年所開而不能詳也斯浦乃水澤之所鍾為鄭陘之淵藪矣渠水右合五池溝上承澤水下流入渠謂之五池口魏嘉平三年司馬懿帥中軍討太尉王凌於壽春自彼而還帝使侍中韋誕勞軍於五池者也今其地為五池鄉矣渠水又東不家溝水注之水出京縣

東南梅山北谿春秋襄公十八年楚為子馮公子格率
銳師侵費右迴梅山杜預曰在密東北卽是山也其水
自谿東北流逕管城西故管國也周武以封管叔矣成
王幼弱周公攝政管叔流言曰公將不利于孺子公賦
鴟鴞以伐之卽東山之詩是也左傳宣公十二年晉師
救鄭楚次管以待之杜預曰京縣東北有管城者是也
俗謂之爲管水又東北分爲二水一水東北流注黃雀
溝謂之黃淵淵周一百步其一水東越長城東北流水
積爲淵南北二里東西百步謂之百尺水北入圃田澤
分爲二水一水東北逕東武強城北漢書曹參傳擊

羽嬰于昆陽追至葉還攻武強因至滎陽薛瓚云按武
強城在陽武縣卽斯城也漢高帝六年封騎將莊不識
爲侯國又東北流左注于渠爲不家水口也一水東流
又屈而南轉東南注白溝也渠水又東清池水注之清
池水出清陽亭西南平地東北流逕清陽亭南東流卽
故清人城也詩所謂清人在彭彭爲高克邑也故杜預
春秋釋地云中牟縣西有清陽亭是也清池水又屈而
北流至清口澤七虎澗水注之水出華城南岡一源兩
派津川趣別西入黃雀溝東爲七虎谿亦謂之爲華水
也又東北流紫光溝水注之水出華陽城東北而東流

俗名曰紫光澗又東北注華水華水又東逕棐城北卽北林亭也春秋文公與鄭伯宴于棐林子家賦鴻雁者也春秋宣公元年諸侯會于棐林以伐鄭楚救鄭遇于北林服虔曰北林鄭南地也京相璠曰今滎陽苑陵縣有故林鄉在新鄭北故曰北林也余按林鄉故城在新鄭東北如北七十許里苑陵故城在東南五十許里不得在新鄭北也考京服之說竝爲疎矣杜預云滎陽中牟縣西南有林亭在鄭北今是亭南去新鄭縣故城四十許里蓋以南有林鄉亭故杜預據是爲北林最爲密矣又以林鄉爲棐亦或疑焉諸侯會棐楚遇于此寧得

知不在是而更指他處也積古之傳事或不謬矣又東北逕鹿臺南岡北出爲七虎澗東流期水注之水出期城西北平地世號龍淵水東北流又北逕期城西又北與七虎澗合謂之虎谿水亂流東注逕期城北東會清口水司馬彪郡國志曰中牟有清口水卽是水也清水又東北白溝水注之水有二源北水出密之梅山東南而東逕靖城南與南水合南水屈合太水西北流至靖城南左注北水卽承水也山海經曰承水出太山之陰東北流注于役水者也世謂之靖澗水也又東北流太水注之水出太山東平地山海經曰太水出于太山之

陽而東南流注于役水世謂之禮水也東北逕武陵城西東北流注于承水又東北入黃瓮澗北逕中陽城西城內有舊臺甚秀臺側有陂池池水清深澗水又東屈逕其城北竹書紀年梁惠成王十七年鄭釐侯來朝中陽者也其水東北流為白溝又東北逕伯禽城北蓋伯禽之魯往逕所由也屈而南流東注于清水即潘岳都鄉碑所謂自中牟故縣以西西至于清溝指是水也亂流東逕中牟宰魯恭祠南漢和帝時右扶風魯恭字仲康以太尉掾遷中牟令政專德化不任刑罰吏民敬信蝗不入境河南尹袁安疑不實使部掾肥親按行之恭

隨親行阡陌坐桑樹下雉止其傍有小兒親曰兒何不擊雉曰將雛親起曰蟲不入境一異化及鳥獸二異豎子懷仁三異久畱非優賢請還是年嘉禾生縣庭安美其治以狀上之徵博士侍中車駕每出恭常陪乘上顧問民政無所隱諱故能遺愛自古祠饗來今矣清溝水

又東北逕沈清一清按沈清下疑脫亭字疑即博浪亭也服虔曰博

浪陽武沙水二名也今有亭一清按漢書張良傳注引服虔曰博浪河南陽武南

地名今有亭史記索隱曰服虔云博浪地名在陽武南而晉志滎陽郡卷縣下云有博浪長沙道元既以博浪

為澤水所鍾又是長沙故云沙水二名但所引服說全與史漢注異未知所據所未詳也歷博

浪澤昔張良為韓報仇於秦以金椎擊秦始皇不中中

其副車於此又北分爲二水枝津東注役水清水自枝
 流北注渠謂之清溝口渠水又左逕陽武縣故城南東
 爲官渡水又逕曹太祖壘北有高臺謂之官渡臺渡在
 中牟故世又謂之中牟臺建安五年太祖營官渡袁紹
 保陽武紹連營稍前依沙堆爲屯東西數十里公亦分
 營相禦合戰不利紹進臨官渡起土山地道以逼壘公
 亦起高臺以捍之卽中牟臺也今臺北土山猶在山之
 東悉紹舊營遺基竝存渠水又東逕田豐祠北袁本初
 慙不納其言害之時人嘉其誠謀無辜見戮故立祠於
 是用表袁氏覆滅之宜矣又東役水注之水出苑陵縣

西隰侯亭東世謂此亭爲郟城非也蓋隰郟聲相近耳

沈氏曰左傳襄公十一年諸侯之師次于瑣杜註苑陵縣西有瑣侯亭續志苑陵縣有瑣侯亭若隰是隰字不與瑣通考字書瑣與瑣通或是瑣字之誤文 中平陂 一清按中平陂上有脫文 世名之渥

泉也卽古役水矣山海經曰役山役水所出北流注于

河疑是水也東北流逕苑陵縣故城北東北流逕焦城

東陽邱亭西世謂之焦溝水竹書紀年梁惠成王十六

年秦公孫壯率師伐鄭圍焦城不尅卽此城也俗謂之

驛城非也役水自陽邱亭東流逕山氏城北爲高榆淵

竹書紀年梁惠成王十六年秦公孫壯率師城上枳安陵

山氏者也又東北爲酢溝又東北魯溝水出焉役水又

東北堽溝水出焉又東北爲八丈溝又東清水枝津注之水自沈城東派注于役水又東逕曹公壘南東與沫水合山海經云末山沫水所出北流注于役今是水出中牟城西南疑卽沫水也東北流逕中牟縣故城南昔趙獻侯自耿都此班固云趙自邯鄲徙焉趙襄子時佛肸以中牟叛置鼎於庭不與已者烹之田英朱氏謀瑋箋曰說苑作田基新將褰裳赴鼎處也薛瓚注漢書云中牟在春秋之時爲鄭之疆也及三卿分晉則在魏之邦土趙自漳北不及此也春秋傳曰衛侯如晉過中牟非衛適晉之次也汲郡古文曰齊師伐趙東鄙圍中牟此中牟不

在趙之東也按中牟當在濕水之北矣按春秋齊伐晉夷儀晉車千乘在中牟衛侯過中牟中牟人欲伐之衛褚師固亡在中牟曰衛雖小其君在未可勝也齊師尅城而驕遇之必敗乃敗齊師服虔不列中牟所在杜預曰今滎陽有中牟迴遠疑爲非也然地理參差土無常域隨其強弱自相吞併疆理畱移寧可一也兵車所指逕紆難知自魏徙大梁趙以中牟易魏故趙之南界極于浮水匪直專漳也趙自西取後止中牟齊師伐其東鄙于宜無嫌而瓚但逕濕水空言中牟所在非論證也

全氏曰有河南之中牟有河北之中牟張守節以鄴西牟山爲趙中牟者近之管子所謂築五鹿中牟鄴者三

城相接也然則非獨滎陽有之矣一清按春秋定九年傳晉車千乘在中牟杜預曰今滎陽有中牟縣迴遠疑非也孔穎達正義曰此中牟在晉境內也趙世家云獻侯即位治中牟漢書地理志云河南郡有中牟縣趙獻侯自耿徙此又云三家分晉河南之中牟也晉世分河南為今滎陽郡中牟屬焉此地乃在河南計非晉竟故云迴遠疑非也又三家分晉中牟屬魏則非趙得都之趙獻侯治中牟亦非河南之中牟也此言晉車在中牟哀五年趙鞅伐衛圍中牟論語佛肸為中牟宰與趙獻侯所都或別是一地必非河南中牟當于河北別有中牟但不復知其處耳有臣瓚者不知其姓或云姓傅作漢書音義云臣瓚案河南中牟春秋之時在鄭之疆內及三卿分晉則為魏之邦土趙界自漳水以北不及此也春秋衛侯如晉過中牟案此中牟非衛適晉之次也汲郡古文曰齊師伐趙東鄙圍中牟此中牟不在趙之東也案中牟當在溫水之上瓚言河南中牟非此中牟誠如其語謂此中牟當在溫水之上不知其所案據也溫水宜是濟漯之漯此為文誤方輿紀要中牟城漢高帝十一在湯陰縣西五十里此即河北之中牟也

年封單父聖為侯國

一清按漢表作單右車此從史表

沫水又東北注

于役水昔魏太祖之背董卓也間行出中牟為亭長所

錄郭長公世語為縣所拘

一清按九功曹請釋焉

役水

又東北逕中牟澤即鄭太叔攻荏蒲之盜于是澤也其

水東流北屈注渠水續述征記所謂自醬魁城到酢溝

十里者也渠水又東流而左會淵水其水上承聖女陂

陂周二百餘步水無耗竭湛然清滿而南流注于渠渠

水又東南而注大梁也

又東至浚儀縣

渠水東南逕赤城北戴延人所謂西北有大梁亭非也

竹書紀年梁惠成王二十八年穰苴

朱氏謀埠箋曰率今竹書作穰疵

師及鄭孔夜戰于梁赫鄭師敗逋即此城也左則故瀆

出焉秦始皇二十年王賁斷故渠引水東南出以灌大

梁謂之梁溝又東逕大梁城南本春秋之陽武高陽鄉

也于戰國為大梁周梁伯之居矣梁伯好土功大其城

號曰新里民疲而潰秦遂取焉後魏惠王自安邑徙都

之故曰梁耳竹書紀年梁惠成王六年四月甲寅徙都

于大梁是也

日知錄曰左傳桓九年梁伯伐曲沃註梁國在馮翊夏陽縣卻芮曰梁近秦而幸焉

是也漢書地理志云馮翊夏陽故少梁也水經注乃誤

以少梁為大梁而不知大梁不近秦也後漢志河南尹

梁故國伯翳後註引博物記云梁伯好土功今梁多有

城亦誤全氏曰少梁左傳文十年晉所取秦邑也漢志

河南郡梁縣臣瓚曰此梁周之小邑見于春秋蓋即指

楚人侵梁及霍之梁在戰國為南梁蓋大梁在浚儀少

梁在夏陽南梁在汝水秦滅魏以為縣漢文帝封孝王

于梁孝王以土地下溼東都睢陽又改曰梁自是置縣

以大梁城廣居其東城夷門之東夷門即侯嬴抱關處

也續述征記以此城為師曠城言郭緣生曾遊此邑踐

夷門升吹臺終古之跡緬焉盡在余謂此乃梁氏之臺

門魏惠之朝居非吹臺也當是誤證耳西征記論儀

封人即此縣又非也竹書紀年梁惠成王三十一年三

月為大溝于北郭以行圃田之水陳畱風俗傳曰縣北

有浚水像而儀之故曰浚儀余謂故汴沙為陰溝矣浚

之故曰浚其猶春秋之浚洙乎漢氏之浚儀水無佗也

皆變名矣一清按顧景范曰詩爰有寒泉在浚之下志云今祥符縣西三十里有寒泉陂即詩所稱

浚水為汴所奪故汴水經大梁北亦兼浚水之名蓋不始於漢氏也浚城寒泉岡亦見瓠子注其國多

池沼時池中出神劍到今其民像而作之號大梁氏之

劍也渠水又北屈分為二水續述征記曰汴沙到浚儀

而分也汴東注沙南流其水東南流逕梁王吹臺東陳

畱風俗傳曰縣有倉頡師曠城上有列仙之吹臺北有

牧澤中出蘭蒲土多儻髦衿帶牧澤方一十五里俗謂

之蒲關澤即謂此矣梁王增築以為吹臺城隍夷滅略

存故迹今層臺孤立於牧澤之右矣其臺方一百許步

即阮嗣宗詠懷詩所謂駕言發魏都南向望吹臺簫管

有遺音梁王安在哉晉世喪亂乞活憑居削隳故基遂

成二層上基猶方四五十步高一丈餘世謂之乞活臺

又謂之婆臺城一清按文昌襍錄繁臺梁孝王按歌吹

繁婆音相近即婆臺也日知錄建昭三年七月戊辰衛

府李延壽為御史大夫一姓繁師古曰繁音蒲元反陳

湯傳御史大夫繁延壽師古音蒲何反蒲元則音盤蒲胡則

師古音蒲谷永傳師古音蒲何反蒲元則音盤蒲胡則

音蒲蒲何則音婆三音互見竝未歸一然繁字似有蒲

音左傳定四年殷民七族繁音步何反儀禮鄉射禮注

今文皮樹為繁豎皮古音婆史記張丞相世家丞司直

繁君索隱曰繁音婆文選繁休伯呂向音步何反則繁

之音婆相傳久矣渠水于此有陰溝鴻溝之稱焉項羽與漢高

分王指是水以為東西之別故蘇秦說魏襄王曰大王

之地南有鴻溝是也故尉氏縣有波鄉波亭鴻溝鄉鴻溝亭皆藉水以立稱也今蕭縣西亦有鴻溝亭梁國睢

陽縣東有鴻口亭先後談者亦指此以為楚漢之分王

非也蓋春秋之所謂紅澤者矣一清按善長之辨非楚漢分畫之鴻溝是矣其

言春秋之紅澤則非也說見獲水注中渠水右與汜水合水上承役水于

苑陵縣縣故鄭都也王莽之左亭縣也役水枝津東派

為汜水者也而世俗謂之堽溝水也春秋左傳僖公三

十年晉侯秦伯圍鄭晉軍函陵秦軍汜南所謂東汜者

也其水又東北逕中牟縣南又東北逕中牟澤一清按漢志河

南郡中牟縣下云圃田澤在西豫州藪即是澤也與淵水合水出中牟縣故城

北城有層臺按郭頒世語及干寶晉紀竝言中牟縣故

魏任城王臺下池中有漢時鐵錐長六尺入地三尺頭

西南指不可動至月朔自正以為晉氏中興之瑞而今

不知所在或言在中陽城池臺未知焉是淵水自池西

出屈逕其城西而東南流注于汜汜水又東逕大梁亭

南又東逕梁臺南東注渠渠水又東南流逕開封縣睢

渙二水出焉右則新溝水注之其水出逢池一清按漢志河南郡

開封縣下云逢池在東北或曰宋之逢澤也臣瓚曰汲郡古文梁惠王發逢忌之藪以賜民今浚儀有逢陂忌

澤是也池上承役水于苑陵縣別為魯溝水東南流逕開

封縣故城北漢高帝十一年封陶舍為侯國也陳畱志

稱阮簡字茂宏為開封令縣側有劫賊外白甚急數阮
 方圍棋長嘯吏云劫急阮曰局上有劫亦甚急其耽樂
 如是故語林曰王中郎以圍棋為坐隱或亦謂之為手
 談又謂之為棋聖魯溝南際富城東南入百尺陂即古
 之逢澤也徐廣史記音義曰秦孝公會諸侯于逢澤陂
 汲郡墓竹書紀年作逢澤一清按史記秦本紀孝公二
 十年會諸侯逢澤徐廣曰開
封東北有逢澤
 不如酈所云斯其處也故應德璉西征賦曰鸞衡東
 指弭節逢澤其水東北流為新溝新溝又東北流逕牛
 首鄉北謂之牛建城又東北注渠即沙水也音蔡許慎
 正作沙音言水散石也從水少水沙見矣一清按二十
 字注中注

楚東有沙水謂此水也

又屈南至扶溝縣北

沙水又東南逕牛首鄉東南魯渠水出焉亦謂之宋溝

也又逕陳畱縣故城南孟康曰畱鄭邑也後為陳所并

故曰陳畱矣魯溝水又東南逕圉縣故城北縣苦楚難

修其干戈以圍其患故曰圉也或曰邊陲之號矣歷萬

人散王莽之篡也東郡太守翟義興兵討莽莽遣奮威

將軍孫建擊之于圉北義師大敗尸積萬數血流溢道

號其處為萬人散百姓哀而祠之一清按郡國志圉有
 高陽亭劉昭補註引

陳畱志云有萬人聚王邑破翟義積又歷魯溝亭又東

南至陽夏縣故城西漢高祖六年封陳豨為侯國魯溝

水又南入渦一清按漢志陳留郡陳留縣魯渠水首受

溝之今無水也沙水又東南逕斗城西左傳襄公三十年

子產殯伯有尸其臣葬之於是城也沙水又東南逕牛

首亭東左傳桓公十四年宋人與諸侯伐鄭東郊取牛

首者也俗謂之車牛城矣沙水又東南八里溝水出焉

又東南逕陳留縣裘氏鄉裘氏亭西又逕澹臺子羽冢

東與八里溝合按陳留風俗傳曰陳留縣裘氏鄉有澹

臺子羽冢又有子羽祠民祈禱焉京相璠曰今泰山南

武城縣有澹臺子羽冢縣人也未知孰是因其方誌所

敘就記纏絡焉溝水上承沙河而西南流逕牛首亭南

與百尺陂水合其水自陂南逕開封城東三里岡左屈

而西流南轉注八里溝又南得野兔水口水上承西南

兔氏亭北野兔陂鄭地也春秋傳云鄭伯勞屈生于兔

氏者也陂水東北入八里溝八里溝水又南逕石倉城

西又南逕兔氏亭東又南逕召陵亭西東入沙水沙水

南逕扶溝縣故城東縣即潁川之穀平鄉也有扶亭又

有洧水溝故縣有扶溝之名焉建武元年漢光武封平

狄將軍朱鮪為侯國沙水又東與康溝水合水首受洧

水於長社縣東東北逕向岡西即鄭之向鄉也後人遏

其上日今水盛則北注水耗則輟流又西長明溝水注之水出苑陵縣故城西北縣有二城此則西城也二城以東悉多陂澤即古制澤也京相璠曰鄭地杜預曰澤在滎陽苑陵縣東即春秋之制田也故城西北平地出泉謂之龍淵泉淵水流逕陵邱亭西又西重泉水注之水出城西北平地泉湧南流逕陵邱亭西西南注龍淵水龍淵水又東南逕凡陽亭西而南入白雁陂陂在長社縣東北東西七里南北十里在林鄉之西南司馬彪郡國志曰苑陵有林鄉亭一清按今續志無是文劉昭補註于苑陵縣下引杜預曰縣東南有林鄉白雁陂又引瀆南流謂之長明溝東轉北屈又

東逕向城北城側有向岡左傳襄公十一年諸侯伐鄭

師于向者也又東右迤為染工陂而東注于蔡澤陂長

明溝水又東逕尉氏縣故城南圍稱云尉氏鄭國之東

鄙弊獄官名也鄭大夫尉氏之邑故欒盈曰盈將歸死

于尉氏也全氏曰欒孺子所對周尉氏之官也善長以此證鄭尉氏之邑則誤矣溝瀆自

是三分北分為康溝東逕平陸縣故城北高后元年封

楚元王子禮為侯國全氏曰按本表是景帝所封索隱云西河又云東平陸在東平胡三

省曰東平近建武元年以戶不滿三千罷為尉氏縣之

陵樹鄉又有陵樹亭漢建安中封尚書荀攸為陵樹鄉

侯故陳畱風俗傳曰陵樹鄉故平陸縣也一清按漢志陳畱郡無平

陸縣也劉昭續志補註于尉氏縣下引陳畱志云有陵樹鄉則東京廢省之說有如酈言抑或班固之失記耳

北有大澤名曰長樂廢一清按劉昭補註尉氏縣下引陳畱志曰北有大澤澤有天子苑有長樂廢漢諸帝以馴養猛獸然則廢非澤名善長誤矣康溝水又東逕扶溝縣

之白亭北陳畱風俗傳曰扶溝縣有帛鄉帛亭名在七鄉十二亭中康溝水又東逕少曲亭陳畱風俗傳曰尉

氏縣有少曲亭俗謂之為小城也又東南逕扶溝縣故

城東而東南注沙水沙水又南會南水其水南流又分

為二水一水南合關亭東又東南流與左水合其水自

枝瀆南逕召陵亭西疑即扶溝之亭也而東南合右水

世以是水與僞陵陂水雙導亦謂之雙溝又東南入沙

水沙水南與蔡澤陂水合水出僞陵城西北春秋成公

十六年晉楚相遇于僞陵呂錡射中共王目王召養由

基使射殺之亦子反醉酒自斃處也陂東西五里南北

十里陂水東逕匡城北城在新汲縣之東北即扶溝之

匡亭也亭在匡城鄉春秋文公元年諸侯朝晉衛成公

不朝使孔達侵鄭伐縣訾及匡即此邑也今陳畱長垣

縣南有匡城即平邱之匡亭也襄邑又有承匡城然匡

居陳衛之間亦往往有異邑矣陂水又東南至扶溝城

北又東南入沙水沙水又南逕小扶城西南流也城即

扶溝縣之平周亭東漢和帝永元中封陳敬王子參為

侯國沙水又東南逕大扶城西城即扶鄉故縣也城北

二里有袁梁碑云梁陳國扶樂人隸釋漢國三老袁君碑云君諱良字厚卿

陳國扶樂人也洪氏适曰碑在開封之扶溝袁君名良歷郎中謁者將作大匠丞相令史廣陵太守議郎符節

令國三老梁相以順帝永建六年卒其孫衛尉滂立此石滂以光和年為相其作九卿當在靈帝之初水經云

扶溝有袁梁碑者誤也一清按袁君名良碑字足據無可疑者酈注作梁良梁音同互用左傳季梁湏水注作

季良亦其類也後漢世祖建武十七年更封劉隆為扶樂侯即

此城也渦水於是分焉不得在扶溝北便分為二水也

其一者東南過陳縣也

沙水又東南逕東華城西又東南沙水枝瀆西南達洧

謂之甲庚溝今無水沙水又南與廣漕渠合上承龐官

陂云鄧艾所開也雖水流廢興溝瀆尚夥昔賈逵為魏

豫州刺史通運渠二百里餘亦所謂賈侯渠也而川渠

逕復交錯畛陌無以辨之沙水又東逕長平縣故城北

又東南逕陳城北故陳國也伏羲神農竝都之城東北

三十許里猶有羲神實中舜後媯滿為周陶正武王賴

其器用妻以元女太姬而封諸陳以備三恪太姬好祭

祀故詩所謂坎其擊鼓宛邱之下宛邱在陳城南道東

王隱云漸欲平今不知所在矣楚討陳殺夏徵舒於栗

門以為夏州後一清按此下有缺文蓋敘楚莊王因申

為夏州則尚有不合者左氏傳曰因縣陳又曰乃復封陳鄉取一人焉以歸謂之夏州孔氏正義曰謂之夏州

者討夏氏鄉取一人以歸楚而成一州城之東門內有故謂之夏州蓋未嘗以陳為夏州也

池池水東西七十步南北八十許步水至清潔而不耗

竭不生魚草水中故臺處詩所謂東門之池也城內

有漢相王君造四縣邸碑文字剝落不可悉識其略曰

唯茲陳國故曰淮陽郡云云一清按漢志淮陽是國名不知此碑何以有郡稱也

王君清惠著聞為百姓畏愛求賢養士千有餘人賜與

田宅吏舍自損俸錢助之成邸五官掾西華陳騏等二

百五人以延熹二年云云故其頌曰修德立功四縣回

附今碑之左右遺墉尚存基礎猶在時人不復尋其碑

證云孔子廟學非也後楚襄王為秦所滅徙都於此文

穎曰西楚矣三楚斯其一焉城南郭裏又有一城名曰

淮陽城子產所置也漢高祖十一年以為淮陽國王莽

更名新平縣曰陳陵故豫州治王隱晉書地道記云城

北有故沙名之為死沙而今水流津通漕運所由矣沙

水又東而南屈逕陳城東謂之百尺溝又南分為二水

新水出焉溝水東南流谷水注之水源上承潞陂陂在

陳城西北南暨犖城皆為陂矣陂水東流謂之谷水東

逕犖城北王隱曰犖北有谷水是也犖即檉矣經書公

會齊宋于檉者也杜預曰檉即犖也在陳縣西北為非

檉小城也在陳郡西南谷水又東流逕陳城南又東流

入于沙沙水又東南流注于潁謂之交口水次有大堰
 即古百尺堰也魏書國志曰司馬宣王討太尉王凌大
 軍掩至百尺場即此場也今俗呼之為山陽堰非也蓋
 新水首受潁於百尺溝王莽名郡為新平一清按此文與上復出
 故堰兼有新陽之名也以是推之悟故俗謂之非矣
 又東南至汝南新陽縣北

沙水自百尺溝東逕寧平縣之故城南晉陽秋稱晉太
 傅東海王越之東奔也石勒追之熾尸於此數十萬衆
 斂手受害勒縱騎圍射尸積如山王夷甫死焉余謂俊
 者所以智勝羣情辨者所以文身祛惑夷甫雖體荷雋

令口擅雌黃汙辱君親獲罪羯勒史官方之華王諒為
 褻矣沙水又東積而為陂謂之陽都陂明水注之水上
 承沙水枝津東出逕汝南郡之宜祿縣故城北王莽之
 賞都亭也明水又東北流注于陂陂水東南流謂之細
 水又東逕新陽縣北又東高陂水東出焉沙水又東分
 為二水即春秋所謂夷濮之水也一清按春秋無夷濮之水之名杜預曰此
時改城父為夷又云夷田在濮水西道元所引前後殆自相伐也枝津北逕譙縣故城
 西側城入渦沙水東南逕城父縣西南枝津出焉俗謂
 之漳水也一水東注即濮水也俗謂之父水也東逕城
 父縣之故城東南流注之

又東南過山桑縣北

山桑故城在渦水北沙水不得逕其北明矣經言過北誤也

又東南過龍亢縣南

沙水逕故城北又東南逕白鹿城北而東注也

又東南過義城縣西南入于淮

義城縣故屬沛後隸九江沙水東流注于淮謂之沙汭京相璠曰楚東地也春秋左傳昭公二十七年楚令尹子常以舟師及沙汭而還杜預曰沙水名也

水經注釋卷二十二終

水經注釋卷二十三

仁和趙一清誠夫錄

陰溝水

汭水

獲水

陰溝水出河南陽武縣蕩蕩渠

陰溝首受大河於卷縣故瀆東南逕卷縣故城南又東

逕蒙城北史記秦莊襄王元年蒙騫擊取成臯滎陽初

置三川郡疑卽騫所築也于事未詳故瀆東分爲二世

謂之陰溝水京相璠以爲出河之濟又非所究俱東絕

濟隧右瀆東南逕陽武城北又東南絕長城逕安亭北

又東北會左瀆左瀆又東絕長城逕垣雍城南昔晉文

公戰勝于楚周襄王勞之于此故春秋書甲午至于衡
 雍作王宮于踐土呂氏春秋曰尊天子于衡雖者也郡
 國志曰卷縣有垣雖城卽史記所謂韓獻秦垣雖是也
 又東逕開光亭南又東逕清陽亭南又東合右瀆又東
 南逕封邱縣絕濟瀆東南至大梁合滾蕩渠梁溝既開
 滾蕩渠故瀆實兼陰溝浚儀之稱故云出陽武逕大梁
 城北左屈與梁溝合俱東南流同受鴻溝沙水之目其
 川流之會左瀆東導者卽汜水也蓋津源之變名矣故
 經云陰溝出滾蕩渠者也
 東南至沛爲過水

陰溝始亂滾蕩終別於沙而過水出焉過水受沙水於
 扶溝縣爾雅曰過爲洵郭景純曰大水溢出別爲小水
 也呂忱曰洵過水也過水逕大扶城西城之東北悉諸
 袁舊墓碑字傾低羊虎碎折唯司徒滂蜀郡太守騰博
 平令光碑字所存唯此自餘殆不可尋過水又東南逕
 陽夏縣西又東逕邈城北城實中而西有瓌郭過水又
 東逕大棘城南故鄢之大棘鄉也春秋宣公二年宋華
 元與鄭公子歸生戰于大棘獲華元左傳曰華元殺羊
 食士其御羊斟不與及戰曰疇昔之羊子爲政今日之
 事我爲政遂御入鄭故見獲焉後其地爲楚所并故圈

稱曰大棘楚地有楚太子建之墳及伍員釣臺池沼具存過水又東逕安平縣故城北陳畱風俗傳曰大棘鄉故安平縣也士人敦養易以統御過水又東逕鹿邑城北世謂之虎鄉城非也春秋之鳴鹿矣杜預曰陳國武平西南有鹿邑亭是也城南十里有晉中散大夫胡均碑元康八年立過水之北有漢溫令許續碑續字嗣公陳國人也舉賢良拜議郎遷溫令延熹中立過水又東逕武平縣故城北城之西南七里許有漢尚書令虞詡碑碑題云虞君之碑諱詡字定安虞仲之後爲朝歌令武都太守文字多缺不復可尋按范氏漢書詡字升卿

陳國武平人祖爲縣獄吏治存寬恕嘗曰于公爲里門子爲丞相吾雖不及于公子孫未必不爲九卿故字詡曰升卿定安蓋其幼字也魏武王初封於此終以武平華夏矣過水又東逕廣鄉城北圈稱曰襄邑有蛇邱亭故廣鄉矣改曰廣世後漢順帝陽嘉四年封侍中摯填爲侯國卽廣鄉也過水又東逕苦縣西南分爲二水支流注於東北賴城入谷爲死過也過水又東南屈逕苦縣故城南郡國志曰春秋之相也王莽更名之曰賴陵矣城之四門列築馳道東起賴鄉南自南門越水直指故臺西面南門列道徑趣廣鄉道西門馳道西屆武平

北門馳道暨于北臺過水又東北屈至賴鄉西谷水注之谷水首受渙水於襄邑縣東東逕承匡城東春秋經書夏叔彭生會晉卻缺于承匡左傳曰謀諸侯之從楚也全氏祖望曰傳文是謀諸侯之從楚者今鈔變作也字則其義乖矣京相璠曰今陳畱襄邑西三十里有故承匡城谷水又東南逕已吾縣故城西陳畱風俗傳曰縣故宋地雜以陳楚之地故梁國寧陵縣之徙種龍鄉也以成哀之世戶至八九千冠帶之徒求置縣矣永元十一年陳王削地以大棘鄉直陽鄉十二年自隰隸之命以嘉名曰已吾猶有陳楚之俗焉谷水又東逕柘縣故城東地理志淮陽之屬縣也城

內有柘令許君清德頌石碎字紊唯此文見碑城西南里許有漢陽臺令許叔種碑光和中立又有漢故樂成陵令太尉掾許嬰碑嬰字虞卿司隸校尉之子建寧元年立餘碑文字碎滅不復可觀當似司隸諸碑也谷水又東逕苦縣故城中水泛則四周隍塹耗則孤津獨逝谷水又東逕賴鄉城南其城實中東北隅有臺偏高俗以是臺在谷水北其城又謂之谷陽臺非也谷水自此東入過水過水又北逕老子廟東廟前有二碑在南門

外漢桓帝遣宦官管霸祠老子命陳相邊韶撰碑隸釋云老子銘篆額在亳州苦縣苦屬陳國故其文陳相邊韶所作碑云延熹八年八月帝夢老子尊而祀之帝紀此年

春冬兩遣中常侍至苦祠老子水經載蒙城王子喬碑亦云延熹八年八月帝遣使致祠國相王璋乃銘紀遺烈蓋威宗方修神仙之事故一時郡國竝作碑表此石立于延熹無疑杜子美云苦縣光和尚骨立誤也一清按注無立碑年月碑云延熹八年八月甲子日是也北有雙石闕甚整頓石闕南側魏文帝黃初三年逕譙所勒闕北東側有孔子廟廟前有一碑西面是陳相魯國孔疇建和三年立北則老君廟廟東院中有九井焉又北過水之側又有李母廟廟在老子廟北廟前有李母冢冢東有碑是永興元年譙令長沙王阜所立碑云老子生于曲過間一清按晉書地道記云曲仁里老子也許慎又云過水首受淮陽扶溝縣滾蕩渠不得至沛方為過水也全氏曰此二十五字疑是注首扶溝縣下之錯簡今次于此是不比

也 過水又屈東逕相縣故城南其城卑小實中邊韶老子碑又云老子楚相縣人也相縣虛荒今屬苦故城猶

存在賴游鄉之東過水處其陽疑即此城也自是無郭以應之過水又東逕譙縣故城北春秋左傳僖公二十三年楚成得臣帥師伐陳遂取譙城頓而還是也王莽之延成亭也魏立譙郡沅州治沙水自南枝分北逕譙城西而北注過過水四周城側城南有曹嵩冢冢北有碑碑北有廟堂餘基尚存柱礎仍在廟北有二石闕雙峙高一丈六尺榱櫨及柱皆雕鏤雲炬上學愚已碎闕北有圭碑題云漢故中常侍長樂太僕特進費亭侯曹

君之碑延禧三年立碑陰又刊詔策二碑文同夾碑東西列對兩石馬高八尺五寸石作粗拙不匹光武隧道所表象馬也有騰兄冢冢東有碑題云漢故潁川太守曹君墓延熹九年卒而不刊樹碑歲月一清按魏志曹仁傳裴松之註引魏書曰仁祖褒潁川太守斯其人也墳北有其元子熾冢冢東有碑題云漢故長水校尉曹君之碑歷太中大夫司馬長史侍中遷長水年三十九卒熹平六年造熾弟允冢冢東有碑題云漢謁者曹君之碑熹平六年立城東有曹太祖舊宅所在負郭對廛側隍臨水魏書曰太祖作議郎告疾歸鄉里築室城外春夏習讀書傳秋冬射獵以自娛

樂文帝以漢中平四年生于此上有青雲如車蓋終日乃解卽是處也後文帝以延康元年幸譙大饗父老立壇于故宅壇前樹碑碑題云大饗之碑碑之東北澗水南有譙定王司馬士會冢冢前有碑晉永嘉三年立碑南二百許步有兩石柱高丈餘半下爲束竹交文作制工巧石牘云晉故使持節散騎常侍都督揚州江州諸軍事安東大將軍譙定王河內溫司馬公墓之神道澗水又東逕朱龜墓北東南流冢南枕道有碑碑題云漢故幽州刺史朱君之碑龜字伯靈光和六年卒官故吏別駕從事史右北平無終年化中平二年造碑陰刊故

吏姓名悉薊涿及上谷北平等人一清按隸釋云漢幽州刺史朱君之碑有

陰在亳州朱君名龜石有碎落不能詳其官闕其可考者嘗以御史中丞督捕益州蠻又為幽州刺史禦鮮卑

爾靈帝光和六年卒後漢西南夷傳蜀郡都夷反執太守雍陟遣御史中丞朱龜討之不能尅李顯發板楯蠻

平之碑所載與傳合過水東南逕層邱北邱阜獨秀巍然介立故

壁壘所在也過水又東南逕城父縣故城北沙水枝分

注之水上承沙水於思善縣世謂之漳水故有漳頭之

名也東北流逕城父縣故城西側城東北流入於過過

水又東逕下城父北郡國志曰山桑縣有下城父聚者

也過水又屈逕其聚東郎山西又東南屈逕郎山南山

東有垂惠聚世謂之禮城袁山松郡國志曰山桑縣有

垂惠聚即此城也過水又東南逕過陽城北臨側過水

魏太和中為州治一清按寰宇記云後魏孝文帝置過

改為譙州改譙縣為過陽縣州治上疑落過字以蓋表為刺史後罷州立郡矜

帶場戍過水又東南逕龍亢縣故城南漢建武十三年

世祖封傅昌為侯國沈氏曰按本傳昌由昆陽徙蕪湖不聞為龍亢也故語曰

沛國龍亢至山桑者也厄林曰闕駟十三州志曰山桑縣人俗貪偽好持馬鞭行邑故

語曰沛國龍亢至山桑詐託旅使若奔喪道過水又屈

遇寇抄遂失資糧酈氏取其一語殊為不備而南流出石梁梁石崩褫夾岸積石高二丈水歷其間

又東南流逕荆山而東流注也

又東南至下邳淮陵縣入於淮

過水又東左合北肥水肥水出山桑縣西北澤藪東南流左右翼佩數源異出同歸蓋微脈涓注耳東南流逕山桑邑南俗謂之北平城昔文欽之封山桑侯疑食邑于此城東南有一碑碑文悉破無驗唯碑背故吏姓名尚存熹平元年義士門生沛國蕭縣劉定興立北肥水又東逕山桑縣故城南俗謂之都亭城非也今城內東側猶有山亭築立陵阜高峻非洪臺所擬十三州志所謂山生于邑其庭有桑因以氏縣者也郭城東有文穆冢碑三世二千石穆郡戶曹史徵試博士太常丞以明氣候擢拜侍中右中郎將遷九江彭城陳畱四郡一清按所

歷止三郡四字疑誤抑或脫失一郡也

光和中卒故吏涿郡太守彭城呂

虔等立北肥水又東積而為陂謂之瑕陂陂水又東南

逕瑕城南春秋左傳成公十六年楚師還及瑕即此城

也故京相璠曰瑕楚地北肥水又東南逕向縣故城南

地理志曰故向國也世本曰許州向申姜姓也炎帝後

京相璠曰向沛國縣今并屬譙國龍亢也杜預曰龍亢

縣東有向城漢世祖建武十三年更封富波侯王霸為

侯國即此城也俗謂之圓城非又東南逕義城南世謂

之楮城非

一清按水經渠水篇云又東南過義成縣西南入于淮此篇注云過水受沙水東南流逕

荆山左合北肥水又東注于淮今鳳陽府懷遠縣東北十五里有渦口城又東北四十五里有向城即過水入

淮之處與漢志合故道元以經言下邳淮陵入淮為非此義城即沛郡之義成縣胡渭云義成故城今名拖城顧祖禹云渦口城今訛為菴城過菴音韵又東入於過聯而注又有楮城之目殆字形之變耳

過水又東注淮經言下邳淮陵入淮誤矣

汲水出陰溝于浚儀縣北

陰溝即蕩蕩渠也亦言汲受旃然水又云丹沁亂流於

武德絕河南入滎陽合汲故汲兼丹水之稱河沛水斷

汲承旃然而東自王賁灌大梁水出縣南而不逕其北

一清按漢志河南郡滎陽縣卞水馮池皆在西南夏水洪泛則是瀆津通故渠

即陰溝也於大梁北又曰汲水矣故圈稱著陳畱風俗

傳曰汲水逕其北者也又東汲水出焉故經云汲出陰

溝於浚儀縣北也

一清按禹貢錐指曰浮于淮泗達于

世謂隋煬帝始通汴入泗禹時無此水道以疑禹貢之

言按漢書項羽與漢約中分天下割鴻溝以西為漢以

東為楚文穎注云于滎陽下引河東南為鴻溝以通宋

鄭陳蔡曹衛與濟汝淮泗會即今官渡是也魏武與袁

紹相持于官渡乃楚漢分裂之處蓋自秦漢以來有之

安知非禹迹耶禹貢九州之水皆記入河水道而淮泗

獨不能入河帝都所在理不應爾意其必開此道以通

之其後或為鴻溝或為官渡或為汴上下百餘里間不

可必然皆引河水而注之淮泗也故王濬伐吳杜預與

振旅還都濟舟師之盛古今絕倫而自泗汴沂河而上

班師則汴水之大小當不減于今又足以見秦漢魏晉

皆有此水道非煬帝創開也吳王夫差闕溝通水與晉

會于黃池而江始有入淮之道禹時則無之故禹貢曰

南溢而為滎而陶邱而荷而汶而海此禹時之濟瀆發源注海也史記河渠書禹功施乎三代自是之後滎陽下引河東南為鴻溝以通宋鄭陳蔡曹衛與濟汝淮泗會此禹後代于滎澤之北引河東南流故水經謂河水東過滎陽縣滎澤渠首受涉東南流者是亦引濟水分流故漢志謂滎陽有滎澤渠首受涉東南流者是又自是之後漢代有疏濬枝津別瀆不可勝數則酈注所謂滎波河濟往復逕通者也雖然其來古矣蘇秦說魏襄王曰大王之地南有鴻溝則戰國前有之爾雅水自河出為澠澠本汭水即汭水則春秋前莫不善于酈道元之言曰昔禹塞其淫水而澤滎澤莽時方枯豈禹塞之乎又曰昔禹塞其淫水而于滎陽下引河滎陽非禹引而謂禹之時已有乎余是以斷自河渠書參以滎陽下引河不見禹貢之書為出禹之後頗自幸其考訂比蘇氏差詳矣按河渠書有自是之後四字百詩據此判鴻溝非禹迹真老吏斷獄手而愚更有進者謂由泗入荷由荷入濟是矣而自陶邱以西舍鴻溝無達河之道也焉得不指為禹迹乎謂滎陽下引河以是矣而由濟達河莫知其所經不顯示以一塗終何以破千古之疑乎是當于濟瀆之間

求之蓋充青徐揚之貢道皆由濟入潔以達河而宋儒謂濟潔二水無相通之處則浮濟者沂陶邱而西且北勢折其非也出于滎陽此蘇氏之論所以近理而人不敢深折其非也誠知經所謂浮于濟者乃至荷會汶之濟而非陶邱滎澤之濟則濟之所以通河者又曰黃文叔云官渡汴水也而紛紜之說不攻自破矣又曰黃文叔云滎澤出河斷非禹迹禹之行河本以河湍悍難行平地故釃二渠以引河而載之高地二渠非得已也後世不識聖人之意妄鑿河為瀆或不順地防或附屬不理故其勢易決蓋非獨滎澤也其下濮水通河而酸棗決瓠水通河而瓠子決汴渠亦屢決至王景治汴而酸棗決瓠水通河而瓠子決汴渠亦屢決至王景治汴而酸棗決瓠十里置水門使更相回注紊亂渠脈而禹迹益壞矣且所為通淮泗者以舟楫之利也荷已通矣而何更用通滎蕩哉其曰禹塞淫水而鑿之者春秋戰國之世商權功利而忽遠圖並植私欲而不顧大經策謀之士託其名于禹而世不之察也河渠書滎陽下引河東南為鴻溝以通宋鄭陳蔡曹衛與濟汝淮泗會此禹後代之際明矣偉哉此論善發禹貢之蘊并可以證徐州達于河

汭水東逕倉垣城南即大梁縣

郡一清按漢志陳畱

大梁續志亦云浚儀本大之倉垣亭也城臨汧水陳留梁是未嘗以大梁名縣也邈走歸京晞使司相畢邈治此征東將軍苟晞之西也邈走歸京晞使司馬東萊王讚代據倉垣斷留運漕汧水又東逕陳留縣之鉞鄉亭北陳留風俗傳所謂縣有鉞鄉亭即斯亭也汧水又逕小黃縣故城南神仙傳稱靈壽光扶風人死于江陵胡罔家罔殯埋之後百餘日人有見光于此縣寄書于罔罔發視之唯有履存汧水又東逕鳴雁亭南春秋左傳成公十六年衛侯伐鄭至于鳴雁者也杜預釋地云在雍邱縣西北今俗人尚謂之為白雁亭汧水又東逕雍邱縣故城北逕陽樂城南西征記曰城在汧北

一里周五里雍邱縣界汧水又東有故渠出焉南通睢水謂之董生決或言董氏作亂引水南通睢水故斯水受名焉今無水汧水又東枝津出焉俗名之為洛架口西征記曰洛架水名也續述征記曰在董生決下二里汧水又逕外黃縣南又東逕莠倉城北續述征記曰莠倉城去大游墓二十里又東逕大齊城南陳留風俗傳曰外黃縣有大齊亭又東逕科城北陳留風俗傳曰縣有科稟亭是則科稟亭也汧水又東逕小齊城南汧水又南逕利望亭南風俗傳曰故曰成安也地理志曰陳留舊名一清按舊名當作縣名漢武帝以封韓延年為侯國全氏曰按

小司馬曰表在邾志在陳畱蓋疑未能決也子謂延年邾人則潁川之邾是也以為陳畱非也善長亦據本志言之耳一清按地理志潁川郡本有成安縣分註云侯國也而小司馬以陳畱之成安當之道元則又兩釋之而不知擇也 汜水又東龍門故瀆出焉瀆舊通睢水故西征

記曰龍門水名也門北有土臺高三丈餘上方數十步

汜水又東逕濟陽考城縣故城南為菑獲渠考城縣周

之采邑也于春秋為戴國矣左傳隱公十年秋宋衛蔡

伐戴是也漢高帝十一年秋封彭祖為侯國一清按索隱曰漢表

彭祖姓祕音響韋昭音符箴反非也今陳畱風俗傳曰

秦之穀縣也後遭漢兵起邑多災年故改曰菑縣王莽

更名嘉穀一清按道元此說非也漢書傳寬傳畧梁別西擊邢說軍菑南破之師古曰菑縣名也後

為考城則秦時己名菑縣非自漢始蓋因王莽更為嘉穀而造作是說章帝東巡過縣詔

曰陳畱菑縣其名不善高祖鄙柏人之邑世宗休聞喜

而顯獲嘉應亨吉之符嘉皇靈之顧賜越有先烈考武

皇其改菑縣曰考城是瀆蓋因縣以獲名矣汜水又東

逕寧陵縣之沙陽亭北故沙隨國矣春秋左傳成公十

六年秋會于沙隨謀伐鄭也杜預釋地曰在梁國寧陵

縣北沙陽亭是也世以為堂城非也汜水又東逕黃蒿

塢北續述征記曰堂城至黃蒿二十里汜水又東逕斜

城下續述征記曰黃蒿到斜城五里陳畱風俗傳曰考

城縣有斜亭汜水又東逕周塢側續述征記曰斜城東

三里晉義熙中劉公遣周超之自彭城緣汧故溝斬樹穿道七百餘里以開水路停薄于此故茲塢流稱矣汧水又東逕葛城北故葛伯之國也孟子曰葛伯不祀湯問曰何為不祀稱無以供祠祭遺葛伯葛伯又不祀湯又問之曰無以供犧牲湯又遺之又不祀湯又問之曰無以供粢盛湯使亳衆往為之耕老弱饋食葛伯又率民奪之不授者則殺之湯乃伐葛葛于六國屬魏魏襄王以封公子無忌號信陵君朱氏謀瑋箋云史記云魏而魏安釐王異母弟也昭王薨安釐王即位封公子為信陵君此云襄王誤也其地葛鄉即是城也在寧陵縣西十里汧水又東逕神坑塢又東逕夏

侯長塢

一清按三國志魏武帝紀袁術退保封邱遂圍陵又追之走九江太壽地無考大約在寧陵襄邑之間又夏侯惇傳領陳畱濟陰太守惇乃斷太壽水作陂身自負土率將士勸種稻民賴其利此夏侯長塢蓋以惇得名續述征記曰夏侯塢至

周塢各相距五里汧水又東逕梁國睢陽縣故城北而東歷襄鄉塢南續述征記曰西去夏侯塢二十里東一里即襄鄉浮圖也汧水逕其南漢熹平中某君所立死因葬之其弟刻石樹碑以旌厥德隧前有師子天鹿累塼作百達柱八所荒蕪頽毀凋落略盡矣

又東至梁郡

一清按漢志秦碭郡高帝五年為梁國續志同作經者乃改云梁郡此與陳縣漢相王君造四縣碑以淮陽國為淮陽郡蒙縣為睢水餘波南入睢

水經注釋

卷二十三

十三 東潛趙氏定本

陽城中

汜水又東逕貫城南俗謂之薄城非也闕駟十三州志以爲貫城也在蒙縣西北春秋僖公二年齊侯宋公江黃盟于貫杜預以爲貫也云貫貫字相似貫在齊謂貫澤也是以非此也今于此地更無他城在蒙西北唯是邑耳考文準地貫邑明矣非毫可知一清按毫與薄字同音又東逕蒙縣故城北俗謂之小蒙城也西征記城在汜水南十五六里卽莊周之本邑也爲蒙之漆園吏郭景純所謂漆園有傲吏者也悼惠施之沒杜門于此邑矣汜水自縣南出今無復有水唯睢陽城南側有小水南

流入於睢城南二里有漢太傅掾橋載墓碑載字元賓梁國睢陽人也睢陽公子熹平五年立城東百步有石室刊云漢鴻臚橋仁祠城北五里有石虎石柱而無碑誌不知何時建也汜水又東逕大蒙城北自古不聞有二蒙疑卽蒙毫也所謂景毫爲北毫矣椒舉云商湯有景毫之命者也闕駟曰湯都也毫本帝嚳之墟在禹貢豫州河洛之間今河南偃師城西二十里尸鄉亭是也皇甫謐以爲考之事實學者失之如孟子之言湯居亳與葛爲隣是卽毫與葛比也湯地七十里葛又伯耳封域有限而寧陵去偃師八百里不得童子饋餉而爲之

耕今梁國自有二亳南亳在穀熟北亳在蒙非偃師也
 古文仲虺之誥曰葛伯仇餉征自葛始卽孟子之言是
 也崔駰曰湯冢在濟陰薄縣北皇覽曰薄城北郭東三
 里平地有湯冢冢四方方各十步高七尺上平也漢哀
 帝建平元年大司空史郤長卿按行水災因行湯冢在
 漢屬扶風今徵之迴渠亭有湯池徵陌是也全氏曰按漢志徵屬
左馮翊不屬右扶風然不經見難得而詳按秦寧公本紀云二年
 伐湯三年與亳戰亳王奔戎遂滅湯然則周桓王時自
 有亳王號湯爲秦所滅乃西戎之國葬于徵者也非殷
 湯矣劉向言殷湯無葬處爲疑杜預曰梁國蒙縣北有

薄伐城城中有成湯冢其西有箕子冢今城內有故冢
 方墳疑卽杜元凱之所謂湯冢者也而世謂之王子喬
 冢冢側有碑題云仙人王子喬碑曰王子喬者蓋上世
 之真人聞其仙不知興何代也博問道家或言潁川或
 言產蒙初建此城則有斯邱傳承先民曰王氏墓暨于
 永和之元年冬十二月當臘之時夜上有哭聲其音甚
 哀附居者王伯怪之明則登而察焉時天鴻雪下無人
 徑有大鳥跡在祭祀處左右咸以爲神其後有人著大
 冠絳單衣杖竹立冢前呼採薪孺子伊永昌曰我王子
 喬也勿得取吾墳上樹也忽然不見時令太山萬熹楷

故老之言感精瑞之應乃造靈廟以休厥神于是好道
 之儔自遠方集或絃琴以歌太一或譚思以歷丹田知
 至德之宅兆實真人之祖先延熹八年秋八月皇帝遣
 使者奉犧牲致禮祠濯全氏曰隸釋改作祗懼非是之敬肅如也國
 相東萊王璋字伯儀以為神聖所興必有銘表乃與長
 史邊乾遂樹之元石紀頌遺烈觀其碑文意似非遠既
 在經見不能不書存焉

獲水出汲水於梁郡蒙縣北

漢書地理志曰獲水也十三州志曰首受菑獲渠

一清按漢

志梁國蒙縣獲水首受菑獲渠汲水注云汲水又東逕濟陽考城縣故城南為菑獲渠道元是注蓋割裂班志

又雜引闕說以成文殆好博之過也

亦兼丹水之稱也竹書紀年曰宋殺

其大夫皇瑗于丹水之上又曰宋大水丹水壅不流蓋

汲水之變名也獲水自蒙東出水南有漢故繹幕令匡

碑匡字公輔魯府君之少子也碑字碎落不可尋識竟

不知所立歲月也獲水又東逕長樂固北已氏縣南東

南流逕於蒙澤十三州志曰蒙澤在縣東春秋莊公十

二年宋萬與公爭博殺閔公于斯澤矣獲水又東逕虞

縣故城北古虞國也昔夏少康逃奔有虞為之庖正虞

思于是妻之以二姚者也王莽之陳定亭也城東有漢

司徒盛允墓碑允字伯世梁國虞人也其先奭氏至漢

中葉避孝元皇帝諱改姓曰盛世濟其美以迄于公察
 孝廉除郎累遷司空司徒延熹中立墓中有石廟廟宇
 傾頽基構可尋獲水又東南逕空桐澤北澤在虞城東
 南春秋哀公二十六年冬宋景公遊于空澤辛巳卒于
 連中大尹左師興空澤之士千甲奉公自空桐入如沃
 宮者矣獲水又逕龍譙國一清按龍譙國未詳寰宇記
 亳州下云後漢熹平五年黃
龍見譙太史令單颺以為其國當有王者興不及五十
 年亦當復見後如其言及文帝即位黃初元年以先人
 舊都立為譙國與長安許昌鄴洛陽號為五都事見後
 漢書方術傳及三國志魏文帝紀熹平之朝譙尚為縣
 屬沛國古侯者即云其國若豫知當塗
 受命改制之事史氏多誣此其驗矣又東合黃水口
 水上承黃陂下注獲水獲水又東入櫟林世謂之九里

柞獲水又東南逕下邑縣故城北楚考烈王滅魯頃公

亡遷下邑又楚漢彭城之戰呂后弟周

全氏曰按項羽
本紀云呂后兄

高帝紀亦云呂后兄非弟也且是周
呂侯名澤周呂其封國非名周也

軍于下邑高祖敗

還從周軍子房肇捐地之策收垓下之師陸機所謂即
 謀下邑者也王莽更名下洽矣獲水又東逕碭縣故城

北應劭曰縣有碭山山在東出文石秦立碭郡蓋取山

之名也王莽之節碭縣也山有梁孝王墓其冢斬山作

郭穿石為藏行一里到藏中有數尺水水有大鯉魚黎

萌謂藏有神不敢犯之凡到藏皆潔齋而進不齋者至

藏輒有獸噬其足獸難得見見者云似狗所未詳也山

上有梁孝王祠獲水又東穀水注之水上承碭陂陂中
 有香城城在四水之中承諸陂散流謂零水滾水清水
 也積而成潭謂之碭水趙人有琴高者以善鼓琴為康
 王舍人行彭涓之術浮游碭郡間二百餘年後入碭水
 中取龍子與弟子期曰皆潔齋待于水傍設屋祠果乘
 赤鯉魚出入坐祠中碭中有千萬人觀之畱月餘復入
 水也陂水東注謂之穀水東逕安山北即碭北山也山
 有陳勝墓觀秦亂首兵伐秦弗終厥謀死葬于碭諡曰
 隱王也穀水又東北注于獲水獲水又東歷藍田鄉郭
 又東逕梁國杼秋縣故城南王莽之子秋也獲水又東

歷

一清按下有脫文

洪溝水注之水南北各一溝溝首對獲世

謂之洪溝非也春秋昭公八年秋蒐于紅杜預曰沛國

蕭縣西有紅亭即地理志之虫縣

一清按此說亦見晉書地道記而顧景范

非之郡國志泰山郡奉高邑劉昭補註曰左傳昭八年

大蒐于紅紅亭在縣西北漢志沛郡虫縣莽曰貢師古

曰虫亦音貢高后三年封楚元王子富為侯國

朱氏謀埠箋云

王子侯表景帝三年更封富為紅侯作高后誤一清按

索隱曰楚元王傳休侯富免後封紅侯紅休蓋二鄉名

王莽封劉歆為紅休王莽之所謂貢矣蓋溝名是同非

楚漢所分也

全氏曰鴻溝史記年表作洪渠漢書音義作洪溝晉志浚儀縣下亦作洪溝則鴻洪

字本通故有指此洪溝為鴻溝者善長特起而糾正之

又東過蕭縣南睢水北流注之

蕭縣南對山世謂之蕭城南山也戴延之謂之同孝山云取漢陽城侯劉德所居里名目山也劉澄之云縣南有冒山未詳孰是也山有箕谷谷水北流注獲世謂之西流水言水上承梧桐陂陂水西流因以爲名也余嘗逕蕭邑城右唯是水北注獲更無別水疑卽經所謂睢水也城東西及南三面臨側獲水故沛郡治縣亦同居矣城南舊有石橋耗處積石爲梁高二丈今荒毀殆盡亦不具誰所造也縣本蕭叔國宋附庸楚滅之春秋宣公十二年楚伐蕭蕭潰申公巫臣曰師人多寒王巡三軍拊而勉之三軍之士皆同挾纊蓋恩使之然矣蕭女

娉齊爲頃公之母郤克所謂蕭同叔子也獲水又東歷龍城不知誰所創築也獲水又東逕同孝山北山陰有楚元王冢上圓下方累石爲之高十餘丈廣百許步經十餘墳悉結石也獲水又東淨淨溝水注之水上結梧桐陂西北流卽劉中書澄之所謂白溝水也又北入於獲俗名之曰淨淨溝也

又東至彭城縣北東入於泗

獲水自淨淨溝東逕阿育王寺北或言楚王英所造非所詳也蓋遵育王之遺法因以名焉與安陂水合水上承安陂餘波北逕阿育王寺側水上有梁謂之元注橋

水傍有石墓宿經開發石作工奇殊爲壯構而不知誰
冢疑卽澄之所謂凌冢也水北流注於獲獲水又東逕
彌黎城北劉澄之永初記所謂城之西南有彌黎城者
也獲水於彭城西南廻而北流逕彭城城西北舊有楚
大夫龔勝宅卽楚老父哭勝處也獲水又東轉逕城北
而東注泗水北三里有石冢被開傳言楚元王之孫劉
向冢未詳是否城卽殷大夫老彭之國也于春秋爲宋
地楚伐宋并之以封魚石崔子季珪述初賦曰想黃公
于邳圯勤魚石于彭城卽是縣也孟康曰舊名江陵爲
南楚陳爲東楚彭城爲西楚文穎曰彭城故東楚也項

羽都焉謂之西楚漢祖定天下以爲楚郡封弟交爲楚
王都之宣帝地節元年更爲彭城郡王莽更之曰和樂郡
也徐州治城內有漢司徒袁安魏中郎將徐庶等數碑
並列植于街右咸曾爲楚相也大城之內有金城東北
小城劉公更開廣之皆壘石高四丈列塹環之小城西
又有一城是大司馬琅邪王所修因項羽故臺經始卽
構宮觀門閣惟新厥制義熙十二年霖雨驟澍汴水暴
長城遂崩壞冠軍將軍彭城劉公之子也登更築之悉
以塼壘宏壯堅峻樓櫓赫奕南北所無宋平北將軍徐
州刺史河東薛安都舉城歸魏魏遣博陵公尉苟仁城

陽公孔伯恭援之邑閣如初觀不異昔自後毀撤一時
 俱盡一清按此處疑有脫文魏書堯暄傳初暄使徐州見州城樓觀嫌其華盛乃令往往毀撤由是更損
 落及高祖幸彭城聞間遺工雕鏤尚存龍雲逞勢奇為
 之曰暄猶可追斬
 精妙矣城之東北角起層樓于其上號曰彭祖樓地理
 志曰彭城縣古彭祖國也世本曰陸終之子其三日箋
 是為彭祖彭祖城是也下曰彭祖冢彭祖長年八百綿
 壽永世于此有冢蓋亦元極之化矣其樓之側衿汜帶
 泗東北為二水之會也聳望川原極目清野斯為佳處
 矣

水經注釋卷二十三終

卷之四